

Ordre du jour

1. 5605 - Projet de loi
- 1) relative à l'organisation du marché de l'électricité;

2) instaurant un poste de Commissaire du Gouvernement à l'Énergie;

3) abrogeant

- la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport;

- la loi du 4 janvier 1928 concernant l'établissement et l'exploitation des réseaux de distribution d'énergie électrique dans le Grand-Duché de Luxembourg approuvant la convention de concession du 11 novembre 1927 ainsi que ses annexes;

- la loi du 30 juin 1927 approuvant le contrat de fourniture de courant du 11 avril 1927 pour l'électrification du Grand-Duché de Luxembourg;

- la loi du 2 février 1924 concernant les distributions d'énergie électrique dans le Grand-Duché de Luxembourg;

- la loi modifiée du 24 juillet 2000 relative à l'organisation du marché de l'électricité;

et

- 4) modifiant
- la loi du 30 mai 2005 portant 1) organisation de l'Institut Luxembourgeois de Régulation; 2) modification de la loi modifiée du 22 juin 1963 fixant le régime des traitements des fonctionnaires de l'État;

- la loi modifiée du 22 juin 1963 fixant le régime des traitements des fonctionnaires de l'État

et

5606 - Projet de loi relative à l'organisation du marché du gaz naturel et abrogeant la loi modifiée du 6 avril 2001 relative à l'organisation du marché du gaz naturel et portant modification 1) de la loi modifiée du 24 juillet 2000 relative à l'organisation du marché de l'électricité et 2) la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport

(Rapports de la Commission de l'Économie, de l'Énergie, des Postes et des Sports - Discussion générale)

2. Dépôt d'une proposition de loi
3. Projets de loi 5605 et 5606
- (Discussion générale - suite - Amendements - Votes et dispenses du second vote constitutionnel - Motions)*

Au banc du Gouvernement se trouvent: MM. Jeannot Krecké et Jean-Marie Halsdorf, Ministres.

(Début de la séance publique à 14.30 heures)

» M. le Président.- D'Sitzung ass op.

Huet déi groussherzoglech Regierung der Chamber eng Kommunikatioun ze maachen?

» M. Jeannot Krecké, *Ministre de l'Économie et du Commerce extérieur.*- Esou wäit nach net, Här President.

» M. le Président.- Da waarde mer bis spéider.

(Hilarité)

Mir kommen zur Diskussioun vun de Projets de loi 5605 a 5606 iwwert de Maart vum Stroum a vum Gas. Béid Projete ginn an enger Diskussioun behandelt. D'Riedezäit ass nom Modell 3 festgeluecht. Et si bis elo ageschriwwen: d'Madame Hetto, d'Madame Brasseur, déi Häre Scheuer, Kox, Mehlen, Henckes an den Här Jaerling. D'Wuert huet elo de Rapporteur vu béide Projets de loi, den honorabelen Här Alex Bodry. Här Bodry, Dir hutt d'Wuert.



1. 5605 - Projet de loi
- 1) relative à l'organisation du marché de l'électricité;

2) instaurant un poste de Commissaire du Gouvernement à l'Énergie;

3) abrogeant

- la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport;

- la loi du 4 janvier 1928 concernant l'établissement et l'exploitation des réseaux de distribution d'énergie électrique dans le Grand-Duché de Luxembourg approuvant la convention de concession du 11 novembre 1927 ainsi que ses annexes;

- la loi du 30 juin 1927 approuvant le contrat de fourniture de courant du 11 avril 1927 pour l'électrification du Grand-Duché de Luxembourg;

- la loi du 2 février 1924 concernant les distributions d'énergie électrique dans le Grand-Duché de Luxembourg;

- la loi modifiée du 24 juillet 2000 relative à l'organisation du marché de l'électricité;
- et

4) modifiant

- la loi du 30 mai 2005 portant 1) organisation de l'Institut Luxembourgeois de Régulation; 2) modification de la loi modifiée du 22 juin 1963 fixant le régime des traitements des fonctionnaires de l'État;

- la loi modifiée du 22 juin 1963 fixant le régime des traitements des fonctionnaires de l'État
- et
- 5606 - Projet de loi relative à l'organisation du marché du gaz naturel et abrogeant la loi modifiée du 6 avril 2001 relative à l'organisation du marché du gaz naturel et portant modification 1) de la loi modifiée du 24 juillet 2000 relative à l'organisation du marché de l'électricité et 2) la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport
- Rapports de la Commission de l'Économie, de l'Énergie, des Postes et des Sports*

» M. Alex Bodry *(LSAP)*, rapporteur.- Här President, Dir Dammen an Dir Hären, mat deenen zwee Gesetzesprojeten 5605 a 5606 iwwert d'Organisatioun vum Stroum respektiv vum Gasmaart hei zu Lëtzebuerg gëtt dat gesetzlecht Ëmfeld vun der Energiepolitik a wesentleche Punkten nei definiert.

Reng formal gesinn, ginn insgesamt véier europäesch Direktiven aus de Joren 2003, 2004 an 2005 an d'Nationalrecht iwwerholl. Déi Direktive betreffen an éischerter Hisiicht d'Festleeë vu gemeinsame Regele fir de Bannemaart vum Stroum a vum Gas.

Dës zwou Direktiven hätte scho misse bis zum 1. Juli 2004 an Nationalrecht ëmgesat ginn. Déi zwou reschtlech Direktive betreffen d'Froe vun der Versuergungssécherheet beim Elektreschen a beim Gas. Bei der Ëmsetzung vun deenen zwou leschten Direktive leie mer besser, well do d'Ëmsetze bis zum 19. Mee 2006 respektiv bis zum 24. Februar 2008 ze geschéien huet.

Et bleift - an dat wëll ech awer hei betounen - déi bedauerlech Tatsaach, dass Lëtzebuerg wéinst Netëmsetzung vun deenen heite wichtegen Texter duerch Décisioun vum 28. September 2006, also en Arrêt vum Europäesche Geriichtshaff op Demande vun der Europäescher Kommissioun, veruerteelt ginn ass. Virun e puer Deeg - ufanks vun dësem Mount - sinn nei Avis motivés vun der Kommissioun géint Lëtzebuerg lancéiert ginn. Lëtzebuerg ass also nach eng leschte Kéier somméiert ginn, fir déi doten europäesch Direktiven ëmzesetzen. Wann dës Transpositioun an d'Nationalrecht net an deenen nächste Woche geschitt, da muss Lëtzebuerg mat säftege Strofe rechnen, dat opgrond vum Artikel 228 vum Europäeschen Traité.

Dëse considérable Retard bei der Ëmsetzung vun zwou wichtegen Direktiven ass schwéier ze entschëllechen, och wann et selbstverständlech, wéi ëmmer, Erklärunge fir déi Retarde gëtt. Ech wëll just hei kloerstellen, dass d'Schold un deene Retarden net bei der Chamber läit, déi sech an der Wirtschaftskommissioun an net manner wéi 19 Sitzunge mat deenen zwee Projete befaasst huet zënter dem Januar vun dësem Joer.

Mäin ausdréckleche Merci als Rapporteur geet u sämtlech Membere vun der Kommissioun, besonnesch och un de Sekretär, un eise Fraktiounspool wéi och un d'Experte vun der Regierung, déi eis déi ganzen Zäit bei eisen Aarbechte begleet hunn. D'Préiwung vun deenen zwee Gesetzesprojeten, déi ganz technesch ausgeriicht sinn, awer e

gewëssene politeschen Zündstoff och beinhalten, ass sécherlech och eng kollektiv Leeschtung.

Och wa mer zum Schluss vun eisen Aarbechten an engem gewëssenen Zäitdrock stoungen, mengen ech zumindest, dass mer et fäerdeg bruecht hunn, eis Aarbechte seriö a korrekt an engem enken Zäitraum auszuféieren. Dat eleng geet och schonn aus der Zuel vun den Amendementer ervir, déi mer net nëmme gepréift hunn, mä déi mer och selwer als Kommissioun verfaasst hunn an dem Statsrot pour Avis zougeschéckt hunn.

Dës zwee Avisë vum Statsrot, och wa mer inhaltlech vläicht net ëmmer 100%eg domadder averstane waren, waren awer ouni Zweifel eng wäertvoll Hëllef bei eisen Aarbechten; och déi sëllechen aner Avisë vun de Chambre-professionnellen. Och eenzel Acteuren am Energieberäich, déi hir schrëftlech Stellungnahmen eragereecht hunn, ware vu grousser Hëllef, vu grousssem Notzen, och wa mer och do net all Suggestioun konnte berücksichtegen.

Ech entschëllege mech derfir, dass mer d'Demande-d'entrevuen, déi och op eis eragereent sinn an deene leschte Wochen, nach net konnte berücksichtegen. Mä all déi, déi eng Entrevue gefrot hunn, hunn och e schrëftlechen Text bei eis eraginn, esou dass mer awer d'Argumenter an d'Uleies vun deenen eenzelne Parteie kannt hunn.

Ech wëll och nach eng aner prinzipiell Bemierkung maachen zu deem heiten Dossier. Et ass erëm eng Kéier, mengen ech, kloer gi bei esou technesch-politeschen Dossieren, déi eng gewëssen Envergure hunn, dass mer mat eisen traditionellen Aarbechtsmethoden an och dem traditionellen Aarbechtsrhythmus hei an der Chamber op d'Grenze vun eise Méiglechkeeten als Parlament stoussen.

Erëm eng Kéier stellt et sech eraus, dass zum Beispill d'Schafen hei an der Chamber vun enger juristescher Zell, vun engem Service also, dee géif en lwwerliese vun de Gesetzestexter maachen, onbedéngt noutwendeg ass. Dat gëtt et och zum Beispill um Europäesche Geriichtshaff hei zu Lëtzebuerg, wou all Arrëten nach eng Kéier vu Juristen einfach formal gesinn iwwerpréift ginn. Dat wär sécherlech och nützlich fir déi vill Texter, déi mer hei hunn, wann een och hei als Chamber iwwer esou eng Zell kéint verfügen. Déi géif also, wéi gesot, reng formal, juristesch déi eenzel Texter nokucken. Sécherlech wär et och net vu Muttwëll, wann en ähnleche Service och op Regierungsniveau géif bestoen.

Wat elo den Detail vun deenen zwee Projets de loi ugeet, verweisen ech op déi relativ voluminéis schrëftlech Dokumenter, besonnesch och déi zwee Rapporten, déi vun der zoustänneger Kommissioun ugeholl si ginn. Ech wëll lech also hei net onnéidegerweis mat ville besonnesch technesch Einzelheete langweilen, mä ech wëll méi konzentriert op eng Rei vu Changementer agoen, déi duerch déi nei Gesetzer wäerten entstoen.

Duerno an engem zweeten Deel versichen ech dann op e puer méi kontrovers Themen am Detail anzegoen, déi am Laf vun eisen Diskussiounen an der Kommissioun opgedaucht sinn. Woubäi ech - do wëilt ech och e Versteedsdemech - déi zwee Texter wëll an engem mëndleche Rapport hei behandeln.

Ech géif mech haaptsächlech op de Stroumdossier konzentrieren, well dat eigentlech dee komplexesten Dossier ass. Et ass och do, wou déi gréissten Diskussiounen waren, wat eenzel Dispositiounen vun de Gesetzesprojeten ugeet.

Et ass nämlech esou, dass an deem dote Beräich d'Regierung probéiert hat, eng Rei vu spezielle Bestëmmungen, déi haut bestinn, notamment en faveur vun Netzbedreier, an engem neie Gesetz ze iwwerhuelen, wat eng Rei vu prinzipielle Froen opgeworf huet. Am Géigesaz zum Gassector gëtt beim Stroum e Service universel définiert, mat enger ganzer Rëtsch vu Regeln, Obligatiounen, déi drunhänken. Duerfir sinn d'Problematik an och den Text méi komplex beim Stroum wéi beim Gas.

Mä derniewent natierlech gëtt et eng ganz Rëtsch vun Deeler vun den zwee Gesetzesprojeten, déi vergläichbar sinn a wou d'Regierung probéiert huet, fir de Spezifisitéit vun deenen zwee Secteuren all Kéiers Rechnung ze droen.

Erlaabt mer dann - an ech kommen awer schonn zu enger Rei vun inhaltleche Froen, déi sech stellen - e puer méi grouss Virbemierkungen ze maachen zum Inhalt.

Éischt Bemierkung: Bei deenen zwee Gesetzesprojeten dréit et sech drëm, de Stroum an de Gasmaart nei ze organiséieren. Dat ass deen eenzeggen Objektiv vun deenen Texter. Dës Texter hunn also keen allgemenge Charakter. Si sinn net ausgeriicht, fir all Froen, déi mat Energie ze dinn hunn, ze regelen. Duerfir gëtt et aner gesetzlech Grondlagen, wéi zum Beispill d'Gesetz vun 2003 iwwert d'rationell Notzung vun der Energie.

Duerfir konnte mir och e gudden Deel vun den Amendementer vun der grénger Fraktioun net berücksichtegen, well hir Propositionen haten eigentlech mat dësem Stroumgesetz näischt ze dinn, well se aner Froe behandelt hunn.

Net méi spéit wéi e Méindeg hu jo och de Wirtschafts- an den Ëmweltminister der Chamber Opschloss ginn iwwert déi zukünfteg staatlech Hëllef beim Energiespueren a bei der Produktioun vun erneierbaren Energien oder och nach bei der Energieberodung. Bei dëser bemierkenswäerter Regierungsinitiativ gëtt versicht, Ëmwelt- a Klimaschutz opgrond vun enger wëssenschaftlecher Potenzialanalys mat wirtschaftlecher Iwwerleeung ze verbannen. Hei ginn déi néideg reglementaresch awer och finanziell Ureizer geschaf, déi mer brauchen, fir eng op Nohaltegkeet ausgeriichten Energiepolitik zu Lëtzebuerg ze erméiglechen, déi och wäert nei Investissementer an nei Aarbechtspulzen an deem dote Beräich zu Lëtzebuerg kënnen schafen.

D'Organisatioun vum Energiemaart dierf natierlech esou enger Politik net entgéintstoen, déi misst eigentlech esou eng Politik favoriséieren.

Déi zweet Virbemierkung: Duerch dës europäesch Direktive gëtt déi virleefeg lescht Etapp vun der Liberaliséierung vu Stroum a Gas duerchgezunn. Lëtzebuerg huet, souwäit ech dat beuerteelen kann, iwwert déi lescht laang Joren, wou déi dote Froen op europäeschem Plang an der Diskussioun waren, an der Regel net zu deene Länner gehéiert, déi där Liberaliséierungseuphorie verfall sinn, mä zu deenen, déi eigentlech mat enger zolitter Skepsis un déi dote Virschléi erugaange sinn.

Dës méi kritesch Positioun, déi d'Lëtzebuerger Regierungen an der Regel haten, huet sech menger Usicht no als net falsch erweisen, well all Zuele schéngen ze beleeden, dass besonnesch de Klengverbraucher net automatesch op der Gewënnersäit ass, wat d'Präisser wéi och d'Versuergungssécherheet ugeet, wann d'Konkurrenz an engem fräie Maart voll zum Droe kënnt. D'Enn vun der Tarifpérequatioun kënnt sech nodeeleg fir hien auswirken.

Während Länner wéi Groussbritannien an de Joren '98 an '99, Däitschland 1998, Eisträich 2001 oder och eenzel skandinavesch Länner scho viru Joren den Energiemaart fréizäiteg fir d'Konkurrenz opgemaach hunn, gehéiert Lëtzebuerg mat Frankräich, mat der Belsch mat zu deene Staten, déi d'Délaien an och gréisstendeels d'Phase vun der Direktiv voll ausgeschöpft hunn.

Den Zweck vun deem war jo eigentlech fir et ze erméiglechen, dass d'Acteuren um Lëtzebuerger Energiemaart d'Geleeënheet hätten, fir sech mat Zäiten op en neit, méi oppend a méi konkurrenzlecht Ëmfeld anzustellen. Ob dat a genügendem Mooss geschitt ass, wäert sech a kierzester Zäit erausstellen.

Traditionell ass jo d'Organisatioun vun eise Stroum- a Gasmaart duerch eng staark Presenz vu Stat a Gemengen, deelweis a Partnerschaft mat privaten Energiekonzerner, geprägt. Et gëtt kaum e wirtschaftleche Beräich, wou d'Presenz vum Stat esou staark ass - an do ass zu Lëtzebuerg och keng Ausnahmesituatioun, dat gëtt et och an anere Länner -, an dat huet bis elo erméiglecht, dass déi öffentlech Interesse berücksichtegt konnte ginn. Dësen Avantage am aktuelle System soll probéiert ginn an deen neie Regime, a seng praktesch Ëmsetzung um Terrain eriwuergehall ze ginn.

Déi drëtt Virbemierkung: Entgéint deem, wat de Statsrot a sengen Avisé schéngt zum Ausdrock ze bréngen, beschränkt sech dat honnertprozenteg Opmaache fir d'Konkurrenz op d'Beräicher vun der Produktioun an de Fournituren, dat heescht, den Akaf an de Verkaf vun Elektresch a vu Gas. D'europäesch Texter gesinn ausdrécklech vir, dass bei den Transport- a Verdeeler netzer déi natierlech Monopole solle bestoen bleiwen. Et soll iwwert deen dote Wee verhënnert ginn, dass et zu engem parallele Bau

vu groussen Infrastrukturen vun eenzelnen Energienetze kënnt, wat weder wirtschaftlech nach ëmweltpolitesch oder urbanisteschesch ze vertriebt wär.

Dat ass zum Beispill e groussen Ënnerscheed zum Beräich vun den Telekommunikatiounen a vum Mobiltelefon. Transport an Distributioun gehéieren zum sougenannten „Marché régulé“, während Produktioun a Liwwerung vu Gas a Stroum zum liberaliséierte Marché gehéieren. Fir dass de fräie Maart ka spillen, muss awer selbstverständlech de fräien Zougang zu den Energienetze garantéiert ginn, zu Notzungspräisser, déi korrekt berechent musse ginn.

Fir dës nei Gesetzzer elo duerstellen an anzuschätzen, wëll ech mech drop beschränken, mech haut an d'Haut vum Endclient, vum sougenannten Otto-Normalverbraucher, ze setzen.

Wat wäert sech fir hien änneren ab dem 1. Juli 2007, oder wat huet sech fir hie verännert ab dem 1. Juli 2007, oder spéitstens wann déi zwee Gesetzesprojeten hei a Kraaft sinn?

De Client, all Haushalt huet d'fräi Wiel vu sengem Gas- a Stroumliwwerant. Nach muss hie selbstverständlech e Fournisseur fannen, dee bereet ass, him déi gewünschte Energie ze liwweren zu vu béide Säiten akzeptéierte Konditiounen. Bis et zu engem neie Liwwerungsvertrag kënnt, gëtt awer duerch d'Gesetz garantéiert, dass de bestehende Fournisseur seng Prestatiounen weiterféiert, soufern de Client him selbstverständlech d'Contrepartie liwwert, dat heescht, och déi Prestatiounen bezilt. Kee brauch also elo ze mengen, e misst direkt en neie Kontrakt ofschléissen, mä u sech kann déi bestehend Situatioun weiderlafen.

D'Erfahrungen am Ausland weisen och, dass et, besonnesch wat déi kleng Clienten, also d'Haushaltsclienten ugeet, normalerweis net direkt zu gréissere Bouleversementer komm ass, wat d'Energieversuergung ubelaangt. Wann et zu Ännerungen kënnt, da maachen déi sech éischter schlächend, an net vun haut op muer.

Beim Elektresch féiert d'Gesetz e sougenannten Universalservice fir kleng Clienten an. Dësen Universalservice begräift d'Recht vu jiddferengem fir un d'Netz ugeschloss ze ginn, d'Festleed vum engem vertragleche Kader, deen de Client schützt, an och e spezielle Regime beim Oftrennen vun der Stroum- a Gasversuergung beim Netbezuere vun de Rechnungen. Schliesslech kritt de Minister en Abléck an d'Präistarifer. Den Approvisionnement vum Client bleift am Normalfall garantéiert, och wann e Fournisseur ausfällt. D'Informatiounen vum Client iwwert d'Herkunft vum Stroum gi verbessert.

Am Stroumberäich bréngt d'Gesetz och vill Neierunge fir den Netzbedreiwer. Hei befanne mer eis bekanntlech op engem geregelte Maart, um Marché régulé, an duerfir ass et och normal, dass do eng ganz Rétsch vu Regelen ze respektéieren sinn. Et gëtt e Konzessiounssystem agefouert. D'Regele vun der buchhalterescher Trennung tëschent der Verkaufsaktivitéit an der Netzbedreiwerung gi weidergefouert - déi gëtt et eigentlech schonn haut. Eng juristesche Trennung tëschent deenen zwou Aktivitéiten ass awer eréischt obligatoresch fir Netzbedreiwer mat iwwer 100.000 Clienten.

Fir de Gasberäich gëllen d'Regele vun der buchhalterescher Trennung och schonn haut, dat gëtt weidergefouert, mä de regelrechten «Unbundling» gëllt nëmme fir d'Transportnetzbedreiwer, an dat ab dem 1. Juli 2009.

Och beim Gas gëllt en Autorisations- statt engem Konzessionsregime, wéi beim Stroum.

Bei Elektresch a Gas mussen d'Notzungsstarifer vun den Netzer vum Minister guttgeheescht ginn. A béide Beräicher gëtt d'Versuergungssécherheet groussgeschrivven; dat war jo den Objet vun zwou Direktiven, déi mer gläichzäiteg hei mat an d'Nationalrecht iwwerhuelen. D'Netzbedreiwer mussen duerfir an Zukunft e Fënnfjoresplang erstellen iwwert d'Entwécklung vun hirem Netz, iwwert déi Investissementer, déi si plangen an deenen nächste Fënnf Joer am Netzberäich ze maachen, an déi dote Programmer mussen erëm all zwee Joer ajustéiert ginn. D'Kontroll vun der Versuergungssécherheet läit besonnesch an den Hänn vum Regierungskommissär fir Energie.

Net zrëckbehalen an deem definitiven Text goufen eng Partie Dispositionen, déi d'Zivilresponsabilitéit vu Stroumnetzbedreiwer aschränke sollten, wéi dat gréisstendeels och am Ausland de Fall war. Gradesou huet sech de Statsrot enger Regelung widderst, déi sollt dem gréissten Netzbedreiwer Virrechter bei engem Netzverkauf zousécheren. Och déi am Regierungsprojet verankert Pri-

vilegië bei der Notzung vun öffentlechem a besonnesch privatem Eegentum bei Aarbechten, déi vum Netzbedreiwer duerchgefouert ginn, sinn um Nee vum Statsrot zumindest deelweis gescheitert.

Hei wäert an Zukunft also den Droit commun spille bei deenen eenzelnen Autorisatiounen, soufern privat Propriétéite concernéiert sinn. De Statsrot huet de Gläichheetsprinzip virum Gesetz ugefouert, fir sech enger gesetzlecher Weiderschreiwung vu bestehender Spezialrechter, déi haut op dem Konzessionsvertrag mat der Cegedel fousen oder op aneren Accorden, ze widdersetzen.

Eenzel Kompromëssvirschléi, déi mer als Kommissioun gemaach hunn, well mer der Iwwerzeegung waren, dass et eigentlech méiglech wär, eng Léisung ze fannen tëschent de Vuë vun der Regierung op där enger Säit, déi dat wollt festschreiwen, wat et vu Spezialrechter haut gëtt, an der prinzipieller Oppositioun vum Statsrot weinst deem Gläichheetsprinzip op där anerer Säit, déi Textformatiounen, déi mer probéiert hunn an d'Diskussioun eranzebréngen, si leider net am Detail vum Statsrot examinéiert ginn. Hien huet sech eigentlech drop beschränkt, seng scho virdu geäussert Opposition formelle einfach ze widderhuelen.

Mir mengen also, dass do sech wäert d'Fro stellen, wéi sech an der Praxis déi nei Gesetzgebung um Terrain wäert duerchsetzen, ob dat praticabel ass oder ob net awer spéiderhin eventuell nach muss legislativ nogebessert ginn op deem dote Punkt, wa sech wierklech an der Praxis gréisser Schwierigkeete bei Aarbechten am Stroum- oder am Gasberäich bei groussen Infrastrukture kënnte stellen.

Ech géif et op jidde Fall als Rapporteur gutt fannen, wa mer an engem Joer géifen e klengen Tëschebilan zesumme mat der Regierung zéien, fir ze kucken, wat déi praktesch Erfahrungen am Émgang an an der Ëmsetzung vun deenen neie gesetzleche Bestëmmungen sinn, an dann eventuell doraus ofleeden, ob et néideg ass, nach legislativ Initiativen an deenen dote Beräicher ze huelen, fir Korrekturen unzembréngen.

E puer Wuert wëll ech och zu de Stroumproduzenten soen. Hei gëtt elo eng Autorisationsprozedur beim Minister agefouert. Dës Genehmigungsflucht gëllt allerdéngs net fir Installatiounen am Beräich Kogeneratioun an erneierbar Energie bis 10 Megawatt. Am Gasberäich gëtt et en Zougangsrecht fir Biogasproduzenten zum Naturgasnetz - dat ass nei! -, an och an deem Beräich gëtt eng gesetzlech Basis geschaf fir d'Afëierung vun enger Ursprungsgarantie fir Biogas.

Beim Stroum a beim Gas gëllt an Zukunft eng Genehmigungsprozedur bei de Fournisseuren, déi hei am Land Energie verkaufen. Si si gehalen, dem Régulateur, dem ILR, an dem Minister eng Rei vun Informatiounen iwwer hir Aktivitéiten ze liwweren. Hir Reglementatiounen mat de Clienten ënnerleien allgemenge Bestëmmungen, dat heescht Conditions générales, déi gewësene Kritären entspreche mussen. Beim Elektresch sinn d'Verkeefer gehalen, hir Clienten iwwert d'Zesummesetzung vun hirer Energie ze informéieren. Hei dréit et sech besonnesch ëm den Undeel vu Stroum aus Kogeneratioun an op der Basis vun erneierbaren Energien.

An dësem Zesummenhang vun der Informatioun vum Bierger an dem Afëiere vun engem Etiquetagesystem géife mer wëllen hei an der Chamber eng Motioun déposéieren, déi mer gemeinsam an der Kommissioun decidéiert hunn. Ech hu se bis elo eleng ënnerschriwwen. Si ass natierlech op fir och nach aner Ënnerschrëften.

An där Motioun froe mer d'Regierung, fir schnellstméiglech dat néidegt Ausfëierungsreglement ze huelen, well d'Chamber selwer ka keng Ausfëierungsbestëmmungen vu Gesetzzer huelen. Dat kann nëmmen d'Exekutiv, also d'Regierung, maachen. Si soll also do schnellstméiglech dat ëmsetzen, wat am neie Gesetzestext steet, a si soll dofir suergen, dass mer en uniformiséierten Informatiounssystem kréien, wou also ëmmer déi gläich Informatiounen gefrot ginn, fir dass se comparabel sinn eng mat där anerer - besonnesch och iwwert déi eenzel Formen vun erneierbaren Energien. An déi Informatioun soll esou breet wéi méiglech gestreet ginn.

Mir hätte gär, dass dat Reglement, wat dat doten a Musek kann ëmsetzen, spéitstens fir den 1. Januar 2008 a Kraaft ass. Dat geet aus där Motioun eraus, déi ech dann hei dem President iwwerreechen an den Dépôt dann hei offiziell maachen.

Motion 1

La Chambre des Députés,

- considérant l'article 18 du projet de loi relative à l'organisation du marché de l'électricité, prévoyant l'instauration d'un système de garantie d'origine pour l'électricité produite à partir de sources d'énergie renouvelables et de la cogénération, ainsi que l'article 49 du projet de loi précité fixant les règles de facturation aux clients finals;

- considérant l'article 21 du projet de loi relative à l'organisation du marché du gaz naturel, qui prévoit l'établissement d'un système de garantie d'origine pour la production de biogaz, de gaz issu de la biomasse ou d'autres types de gaz basés sur des sources d'énergie renouvelables;

- considérant l'importance de l'«étiquetage» de l'électricité et du gaz en fonction de leurs sources d'énergie primaires, permettant aux clients finals de choisir leur fourniture d'énergie en parfaite transparence et connaissance de cause;

- consciente que les systèmes luxembourgeois de garantie d'origine seront largement tributaires des données fournies de la part des importateurs étrangers d'énergie, relevant de législations nationales différentes, et qu'à l'heure actuelle, une réglementation européenne afférente fait défaut;

invite le Gouvernement

- à élaborer les règlements d'exécution prévus aux articles susmentionnés dans les meilleurs délais afin d'en assurer la mise en vigueur pour le 1^{er} janvier 2008;

- à assurer une information très large et unifiée des clients résidentiels sur l'origine détaillée de l'énergie fournie.

(s.) Alex Bodry, Françoise Hetto-Gaasch, Henri Kox, Marcel Sauber, Marco Schank.

Et ass an deemselwechten Zesummenhang ze bedauern, dass et bis elo op europäeschem Plang net méiglech war, sech op en eenheetleche System ze eenegen, wat vill méi einfach wär, fir herno dat Gantz duerchzeféieren, well elo sinn eigentlech déi eenzel Fournisseuren och hiren nationale Legislatiounen ënnerworf, déi aner Regele vu Land zu Land festleeën, an dat dréit net onbedéngt zu méi Transparenz vun deem ganze System bäi. Mä dat soll eis awer net dorun hënnen, eis eegen Hausaufgab esou schnell wéi méiglech ze maachen an deen dote System vun der Ursprungsgarantie a vun der Informatioun vum Bierger herno op den eenzelne Facturen ze berücksichtegen, fir dass mer deen och kënnen konkret an engem ganz generéise Sënn ëmsetzen.

Ier ech elo an engem zweeten Deel op eng Partie méi kontrovers Punkten nach eng Kéier am Detail wollt zrëckkommen, wollt ech e puer Wuert soen zu där allgemenger politescher Approche, déi mir eigentlech an den Aarbechte vun eiser Kommissioun hatten, fir un déi Texter vun der Regierung erunzegoen.

Déi Approche, déi mir hatten, déi läit sécherlech am Kär méi no bei der Haltung, déi d'Regierung hat, wéi bei där Philosophie wéi se eigentlech aus den Avisë vum Statsrot ervirgeet, wat eng Philosophie ass, déi ganz staark vu wirtschaftsliberale Gedanken geprägt ass an déi an eisen Aen esou net voll ka gëllen.

Als Kommissioun wollt mir d'Direktiv propper, am léifsten eent zu eent, ëmsetzen. Do wou de Memberstaten allerdéngs eng Marge de manoeuvre, eng Marge d'appréciation vun den Direktiven zougestane gëtt, wollt mer och vun dëser Fräiheet profitéieren, fir déi bestehend Strukturen an Acteuren um Lëtzebuerger Stroum- a Gasnetz ze berücksichtegen.

Hei baue mer net aus dem Näischt en neie System op, mä et geet drëm, dass mer de bestehende System upassen un nei Regelen. An et ass eng breet gedeelte Suerg gewiescht an där zoustänneger Chamberskommissioun, fir ze verhënnen, dass d'öffentlech Hand soll d'Kontroll iwwert d'Stroum- an d'Gasnetzer verléieren.

Am Géigendeel, mir sinn alleguerten der Meenung gewiescht, dass de Stat an d'Gemengen zumindest majoritär an zukünftigen Netzbedreiwerstrukture solle vertrat

sinn. Dat ka geschéien an enger grousser nationaler Netzgesellschaft, an zwou nationalen Netzgesellschaften. Dat ka geschéien och a méi Netzgesellschaften. Wat ech mer allerdéngs géif wënschen, dat ass, dass esou eng national Léisung - fir déi ech perséinlech eng Präferenz hätt - net un iergendwelleche Lokalpatriotismusse géif scheitern.

Derniewent wollt ech och ervirsträichen, dass esou eng Interessekonzentratioun vum Stat elo op d'Netzer net sollt mat engem komplette Réckzuch vu Stat a Gemengen aus de Verkafs- a Produktionsstrukture verbonne ginn. Et ass wichteg, eng Kontroll iwwert d'Netzer vu Gas a Stroum ze hunn, et ass awer och wichteg, dass de Stat, deelweis och d'Gemengen, nach present sinn, och an aneren Aktivitéiten am Gas- an am Stroumberäich, wéi dat historesch jo och hei zu Lëtzebuerg de Fall ass. An eigentlech si mer, mengen ech, gutt gefuer mat där historesch gewuessener Struktur, mat deene Prozeduren, wéi mer se hei zu Lëtzebuerg kennen, a mir verfügen iwwer e wierksamt Netz an deenen zwee Beräicher.

Mir haten och d'Suerg, als Kommissioun, vum Héichhale vum öffentlechen Intérêt an engem sensibele Beräich och fir déi wirtschaftlech Entwécklung vum Land a fir d'Liewe vun all Bierger. An et geet och net zulescht bei all deenen heite Froen ëm d'Erhalen a vläicht d'Neischafe vun Aarbechtsplazen am Energiesecteur.

Komme mer elo ganz kuerz zu eenzelne méi kontroverse Punkten, wéi se an der legislativer Prozedur opgedaucht sinn.

Deen éischte Punkt, deem ech wollt uschneiden, dat ass jo deem, deem haaptsächlech an der öffentlecher Diskussioun an deene leschten Deeg a Woche war, dat ass d'Fro: Wéi sinn d'Acteuren, besonnesch d'Gemengen, eigentlech preparéiert op déi nei Situatioun, déi elo op se duerkënnt?

Woubäi ech wëll betounen, dass déi Situatioun esou nei erm net ass, well eis jo mindestens zënter 2002 bekannt war, wéi déi eenzel Etappe vum Opmaache vum Energiemarché géifen ausgesinn, an dass et gewosst war, dass also no an no do géif d'Konkurrenz méi spillen, dass gewëssen Trennungen misste gemaach ginn, an dass sech eng ganz Rëtsch vu praktesche juristesche Problemer och géife stelle fir d'Gemengen, déi jo traditionell hei am Energiesecteur och eng staark Presenz hunn.

Dat géllt besonnesch fir d'Stad Lëtzebuerg. Dat géllt awer och fir eng Gemeng wéi Esch a fir aner Gemengen am Stroumberäich respektiv och am Gasberäich, wou et och en Zesummeschloss gëtt vun eenzelne Gemengen, fir do och de Verkauf an de Verdreif vum Gas virzehuelen.

D'Obligatioun, déi déi aktuell Gesetzgebung a puncto Prozeduren an a puncto Kontabilitéit deenen eenzelnen Acteuren am Stroum- oder am Gasberäich gëtt, ass haut net an alle Fäll respektéiert. Ech mengen, dat ass eng Feststellung, déi ee muss maachen. Obwuel mer relativ kloer gesetzlech Bestëmmungen hunn - net am schlechte Wëllen -, bréngen et einfach eng ganz Rëtsch vu Mengengenaacteuren net fäerdeg, all dat ze liwweren an där gewënschter Form, wat se eigentlech och haut scho misste liwweren. Déi Situatioun gëtt natierlech net besser wa mer an déi nei gesetzlech Rumm hei erakommen, wou éischter nach zousätzlech Obligatiounen op si wäerten duerkommen. Dat ass eng Feststellung, déi ee muss maachen.

Besonnesch kriddelech ass et sécherlech, dass mer bei de Gemengen hei op Onsécherheeten, Onkloerheete stousse bei der Ausleeung vun eenzelnen Texter, déi d'Gemeingenaktivitéite reglementéieren. Ob dat Verfassungstexter sinn, ob dat Texter si vum allgemenge Gemeindegesetz, ob et Texter si vun der Fonction publique, déi sech och op dem Gemeinsektor uwenden, et stellt een einfach fest, dass do grouss Rechtsonsécherheet besteet an och relativ fluctuant Interpretatiounen um Niveau vum Innenministère, wat eenzelner vun deenen Texter ugeet.

D'Gemenge Lëtzebuerg an Esch sinn e wichtege Schrëtt gaangen, fir eng kommerziell Gesellschaft ze grënnen; fir de Moment niewent hire Gemengeservicer, déi sech mat Energiefroen ofginn. D'Gemeng Sten-

gefort huet och en anere Schrëtt gemaach; si huet sech mat der Cegedel verbonnen, wat hiert Stroumnetz ugeet. Aner Gemengen hunn déi Schrëtter nach net gemaach, nach net vollzunn, a versichen, méi recht wéi schlecht an hiren traditionelle Service-Strukture mat där neier Situatioun eens ze ginn.

Eent muss ee feststellen: D'Gemenge sinn zimlech eleng gelooss ginn iwwert déi lescht Joren - dat ass jo kee Phänomeen vun deene leschten een, zwee Joer - mat deenen dote wichtege Froen. D'Fro zum Beispill och, ob et méiglech ass, dass eng Gemeng als Service oder als Gesellschaft, wa se zu 100% Anteilnehmer vun enger Gesellschaft ass, därer iwwert d'Gemeingegrenzen eraus Energie liwweren. Normalerweis därer eng Gemeng jo nëmmen um Territoire vun hirer Gemeng Aktivitéiten ofwéckelen. Därer se, wa se eng aner Forme juridique hëlt, eigentlech iwwert déi dote Grenze sprangen oder net? Wat soen d'Gerichter dozou am Fall vun enger Plainte vun engem Konkurrent? All déi Froen bleiwen eigentlech bis haut ongekläert.

D'Regierung huet an deenen alen Texter, déi haut spillen, an och an deenen neien Texter déi dote Froen net behandelt. Et kann een einfach feststellen, dass reng juristesche gekuckt kee Problem ass, dass déi Gemengen, déi dat haut scho maachen, och nach weiderhi Gas an Elektresch kënne verkafe respektiv och Propriétaire vun den Netzer sinn. Mä et stelle sech ganz vill praktesch Froen a ganz vill technesch juristesche Froen do ronderëm, déi net propper gekläert sinn.

Fir dat ze maachen, hate mer jo och als Kommissioun decidéiert, den Innenminister bei eis ze ruffen, fir mat him a mat senger Mataarbechter all déi Froen do duerchzegoen. Den Innenminister huet och - dat muss ech soen - eng gewësse Flexibilitéit gewisen, wat d'Interpretatioun, d'Ausleef vun de bestehende Gemeindegesetze ugeet. Hien hat awer och fir eenzelner vun de Punkten, déi mer ugeschwat hunn, keng fäerdeg juristesche tragbar Léisung parat.

Doropshin hu mer als Kommissioun decidéiert, der Regierung - dem Innenminister - ze schreiwen an him matzedeelen, dass mer eigentlech an deem dote Punkt d'Bedenke vum Statsrot an och vum Syvicol deelen an dass mer der Meenung sinn, dass mer misste kucken, besonnesch wat d'Problematik vum Statut vum Personal ugeet, wou sech jo eigentlech eng vun de Froen drëm dréit, déi elo opgeworf ginn ass an den Diskussiounen, fir bestehend Gemeingepersonal mam Statut an eng Energiegesellschaft eriwuerzehuelen, wéi een dee Problem do ka léisen. Mat eisen aktuellen Texter vum Statut vum Fonctionnaire ass dat net méiglech.

Duerfir muss also, wann een do wëllt eng propper Léisung fannen, légiféiert ginn an deem dote Beräich, wéi och an anere Beräicher. Dat kann awer an den Ae vun der Kommissioun nëmmen no Verhandlung mat de Gewerkschaften aus deem dote Sektour passéieren. Dat schéngt mer hei evident ze sinn. Hei geet et drëm, dass mer e puer elementar Regeln och vu statutarresche Froen respektéieren. Also, eng legislativ Émänerung ass an eisen Aen noutwendeg, mä dat muss virdu selbstverständlech geschéien, no Konsultatioun an no Verhandlung mat de Gewerkschaften aus dem öffentleche Sektour.

Hei besteet also akuten Handlungsbedarf. An ech soen, dass mer mat grousser Interesse déi Gesetzesproposition hei zur Kenntnis geholl hunn, déi virun e puer Deeg vun eenzelnen Deputéierte vun deene Gréngen a vun der DP hei virgestallt ginn ass. Dir erlaabt mer awer als Rapporteur, e kengt Bedauern auszuschwätzen, dass déi dote Virschléi net an d'Kommissiounsarבעchte mat konnten afléissen. Et ass emol ni dovunner Rieds gaangen, dass esou e Virschlag géif gemaach ginn. Wann dat sécherlech e puer Méint éischter gewiescht wär, dann hätt ee vläicht kënnen déi dote Virschléi scho mat an deem ganze Prozess vun eisen Aarbechte berücksichtigen. Dat ass net de Fall. Mä ech mengen, d'Debatt ass weider op a sécherlech wäert dat doten nach e Punkt sinn, deem dës Chamber an deenen nächste Méint a Joren nach wäert beschäftegen.

» **M. le Président.**- Här Bodry, den Här Bausch wëllt lech eng Fro stellen. Erlaabt Der déi?

» **M. Alex Bodry** (LSAP), rapporteur.- Selbstverständlech.

» **M. François Bausch** (DÉI GRÉNG).- Här President, ech wollt den Här Bodry froen, ob hien dann awer net der Meenung ass, datt et eigentlech, wéi mer den Innenminister an d'Kommissioun convoquéiere

gelooss hu scho virun e puer Méint, fir iwwert déi Fro ze diskutéieren, an der Regel awer esou wär, datt den Innenminister, dee sech jo der Problematik bewosst ass, hätt misse relativ séier handelen, wou mer jo wëssen, datt déi Problematik hei op d'Gemengen elo relativ brutal wäert duerkommen, datt am Kader vun deem heite Gesetz d'Regierung iwwert den Innenminister seng Aarbecht hätt misse maachen.

Mir sinn och dovunner ausgaangen. Duerfir hu mer déi Proposition de loi gemaach wéi mer elo op eemol gesinn hunn, datt d'Gesetz esou schnell géif duerch d'Chamber goen. Ech mengen, den Här Bodry weess jo och, datt et net ursprüngelech esou geduecht war, datt dat Gesetz nach virun der Summerpaus hätt solle gestëmmt ginn.

Mir maachen dat elo aus de Grënn, well d'Regierung Retard huet, well mer soss Amendé mussen bezuelen. Duerfir mussen mer et jo séier duerchkréien. Mä ass hien awer net der Meenung, datt den Innenminister hei seng Hausaufgab hätt misse maachen an effektiv an deem heite Kader déi Propositionen, déi mir elo gemaach hunn, hätt misse maachen, oder ähnlecher zumindest, fir d'Gemengen à même ze setzen, dat, wat elo haut decidéiert gëtt, och ëmzesetzen?

» **M. Alex Bodry** (LSAP), rapporteur.- Ech sinn der Meenung, dass den Innenminister hei seng Verantwortung muss iwwerhuelen, wéi d'ganz Regierung hei gefuerdert ass, wéi iwwerengs och schon eigentlech déi viregt Regierung gefuerdert war mat där ganzer Fro. Well ech hu gesot, vun 2002 un ass eigentlech bekannt, wat géif kommen. Dat ass ënnerschat ginn. D'Problematik ass menger Usiicht no ënnerschat ginn. Dat ass net gutt.

Duerfir wäerte sécherlech nach Initiative kommen. Ech weess elo aus Gespréicher mam Innenminister eraus, dass hie wëllt esou Virschléi an nächster Zäit maachen. Mä et bleift awer fir mech eng Fro vu Fairness. Ech hätt et fair fonnt, am Geescht vun engem korrekten Émgang ee mat deem aneren, wann dat net parallel zu där leschter Kommissiounssitzung, déi mer haten, komm wär, wou ech meng Projets de rapport virgestallt hunn, mä wann ee virdrun einfach matgedeelt kritt hätt: Hei, mir huelen elo eng Initiativ an deenen dote Beräicher. Déi Informatioun ass net eriwergaangen. Ech fannen dat e bësse schapppeg; loosse mer dat emol soen.

Den zweete wichtege Punkt, dee vill diskutéiert ginn ass, dat ass dee vun de Sonderrechter, déi d'Netzbedreiwer, besonnesch haut dann d'Cegedel, de facto hei zu Lëtzebuerg hunn. Wéi gesot, deelweis fousst dat um Konzessionsvertrag, deelweis fousst dat op vertraglecher Basis, op Accorden, déi an deene leschte Joren an deem dote Beräich fonnt si ginn.

D'Regierung hat eigentlech wëlles, eent zu eent dat ze iwwerhuelen, wat elo besteet, an ze soen: Hei, och an Zukunft soll den Netzbedreiwer aus ganz prakteschen Iwwerleeungen d'Méiglechkeet hunn, fir eng Rëtsch vun Aarbechte schnell ze maachen. Duerfir also gewësse Rechter, wat d'Verfügung iwwert den Domaine public ugeet, wat d'Verfügung iwwert d'Voirie publique ugeet, eng Rei vun extrae Rechter, wat d'Baugenemegungen ugeet.

De Statsrot huet gesot, dass dat net geet. De Statsrot huet sech och do beruff op de Prinzip, dass jiddferree virum Gesetz gläich ass, dass also jiddferreen, deenen enger no der Interpretatioun vun eise Gerichter vergläichbarer Situatioun ass, och muss gläich behandelt ginn. A si hu sech formell opposéiert a ganz wesentleche Punkten, dass déi Avantagen, déi d'Netzbedreiwer hate bei hiren Aarbechten, géife weider festgeschriwwen ginn an Zukunft an deem neie Gesetz.

Munches vun deem, wat de Statsrot seet, léisst sech novollzéien. Et ass effektiv, dass an eise Rechtsverständnis vun haut, wat sech wahrscheinlech jo awer an enger Zäit vu méi wéi 80 Joer liicht geännert huet,...

(Interruption)

...et eigentlech schwéier ass ze verdeeden, dass à la rigueur enger privater Gesellschaft méi Rechter zougestane ginn, wéi d'Gemengen an de Stat der selwer hunn. Wann d'Gemengen an de Stat Infrastrukturarבעchte maachen, kënnen déi net op déi Sonderrechter zrëckgräifen, déi hei dra sinn. Déi sinn am Prinzip alle Genehmigungsprozeduren ënnerworf. Duerfir mengen ech schon, dass de Statsrot net falschlouch, andeem e prinzipiell déi dote Fro opgeworf huet.

Natierlech ass dat hei eng 180-Gradwende praktesch par rapport zu där Situatioun, wéi mer se iwwer Jorzéngte kannt hunn, a si be-

gräift och eng Rei vu Risiken. Dat soll een och net ënnerschätzen. Risiken, dass aus iergendwellechen egoistesche Grënn Projeten iwwer länger Zäit gestoppt sinn, déi an deem sensibele Beräich vun der Stroum- a Gasversuergung awer riskéieren domadder e gewëssene Schued unzeriichten, wa se net an engem gewëssenen Timing kënne realiséiert ginn.

Et war déi Iwwerleeung och, déi eis als Kommissioun dozou verleet huet, de Versuch ze starten, e puer Kompromësstexter an d'Diskussioun eranzekréien. Déi hu mer a Form vun Amendementer weidergereecht un de Statsrot - wéi deenen zum Beispill, wat d'Baugenemegungen ugeet, dass do u sech et net esou wär, wéi d'Regierung virgeschloen huet, dass si keng Baugenehmung iwwerhaapt bräichten, mä dass se eng prinzipiell Baugenehmung hätten, mä dass et dann awer un den zoustännige Stellen an normalerweis um Buergermeeschter ass, fir déi prezis Konditiounen vu Fall zu Fall festzeleeën.

Dat géif jo och sécherstellen, dass déi néideg Informatiounen am Virfeld do sinn an dass eng Concertatioun stattfënnt. An dat ass, mengen ech, jo och e Begier, dee vill Responsabele vun de Gemengen hunn, dass, wann esou Aarbechte gemaach ginn, dobäi ëmmer eng ganz enk Ofsprouch a Concertatioun stattfënnt tëschent där Firma, déi d'Aarbechte mécht, an de Gemengen, déi responsabel si fir d'Organisatioun vun Liewen um Territoire vun hirer Gemeng.

Eng aner Ännerung, déi mer als Kommissioun virgeholl hunn als Amendement an déi vum Statsrot net weider kommentéiert ginn ass, dat ass d'Fro vun der Verleeung an de Buedem vun de Stroumleitungen a vun der Verdeelung vum Käschtepunkt vun deenen doten Aarbechten. Do besteet elo opgrond vu Verträge d'Situatioun, dass haut, wann esou eng Verleeung gemaach gëtt, well een do ausget vum der Hypothees, dass dat op Demande, op Wonsch vun de Gemenge geschitt, dee gréissten Deel vun deem Käschtepunkt vun de Gemenge muss iwwerholl ginn. 70 respektiv 80% vun de Käschte vum Génie civil falen op d'Kap vun de Gemengen.

Mir waren als Kommissioun der Meenung, dass deem dote System eigentlech net méi ze hale wär, zumools well jo och elo an de Gesetzestext de Prinzip stoe kënn, dass an allen Zonen, déi net Gréngzon sinn, d'Leitunge sollen ënnerierdesch geluecht ginn. Et sief, et wiere schwéierwiegend technesch respektiv finanziell Argumenter do, fir dat net ze maachen.

Duerfir hu mir proposéiert, fir dat elo fifty-fifty opzedeele tëschent deemjéinegen, deem d'Aarbecht mécht, also der Stroumfirma, an de Gemengen op där anerer Säit. Dat huet dann och zur Folleg, dass do nëmmen een Deel vun deem Käschtepunkt répercutéiert gëtt op de Stroumpräis. Deenen aneren Deel gëtt gedroe vun de Budgete vun de Gemengen.

Wat d'Enteegnungsprozeduren ugeet, do huet sech de Statsrot widdersat, dass do och géif d'Bedriewergesellschaft, d'Netzbedriewergesellschaft an eng extra Situatioun erakommen. D'accord, fir kënnen Expropriatiounen ze maachen, mä bei deenen Expropriatiounen gëtt déi Firma betruucht wéi eng Privatpersoun a si kënn net an déi speziell Prozeduren eran, wéi wann et eng öffentleche Institutioun wär, déi esou eng Expropriatioun virhëlt. Mä momentan hu mer nach ëmmer keng Gesetzgebung, déi mer kéinten applizéieren an deem dote Beräich.

Drëtt Fro - an da kommen ech och gläich zum Enn -, eng Fro, déi vill diskutéiert ginn ass, zu där mer vill Stellungnahme kritt hunn an déi am Avis séparé vum Statsrot gestanen huet, dat ass d'Fro: Wat geschitt, wann e Keefer vu Stroum a Gas seng Rechnung net bezilt?

Do muss ee fir d'éischt emol soen, dass mer haut do quer keng Regelung hunn. Haut gëtt et keng speziell Gesetzesregelung, wou déi dote Fro prezis definéiert wär. Et hängt da vun der vertraglecher Situatioun of, wat vu Fall zu Fall geschitt.

An Zukunft gëtt dat anescht, an Zukunft ginn hei eng Rei vu Regele festgeluecht, wou ech mengen, dass dat Mindestregele misste sinn, wou kloergestallt ass, dass op där enger Säit Délaie spillen: fir d'éischt d'Echéance an der Facture selwer, dann e Rappel no 15 Deeg, wann déi Echéance vun der Facture ofgelaf ass, dann den zweete Rappel erm eng Kéier no 15 Deeg mat der Ukënnegung, dass dann no 15 Deeg ofgepézt gëtt. An do, dat ass en Amendement vun der Kommissioun, wollte mer preziséieren, dass da muss den Office social vun der Gemeng informéiert ginn iwwert déi lescht Sommatioun, déi de Verkeef ausstellt.

Dat ass de Mechanismus, wéi en ausgesäit. En ass sécherlech net perfekt. Mä och hei si mer eigentlech virun der kriddelecher Situatioun, dass mer eng allgemeng fest Regel wëlle festsetzen an déi Situatiounen um Terrain awer fuerchtbar grondverschidde sinn: Leit, déi aus schlechtem Wëllen net bezuehlen - där gëtt et! Dat sinn och net nëmme Privatpersounen, déi hei concernéiert sinn, oft! Ech mengen, dat wëssen déi Leit, déi an de Gemenge sinn. Wa se hire Restantenétat duerchginn, gesi se jo relativ kloer, wat fir eng Sorten, wat fir eng Villfalt vu Situatiounen sech do erëmfannen. Dat ass och hei net anescht.

Dat heescht, et muss ee probéieren, hei e Mëttelwee ze fannen, Mëssbräich esou wäit wéi méiglech auszuschalten, Mëssbräich vun deenen engen, déi vun engem ze generéise System wëllte profitéieren, fir weiderhin op d'Käschte vun aneren ze liewen. Op där anerer Säit mussen echt Noutsituatiounen awer och kënne schnell an onbürokratesch enger Léisung zouzeféiere sinn.

Mir mengen, dass deen Text dat do kann erreechen, mä och do misst een no engem Joer wierklech Bilan zéien iwwert déi dote speziell Dispositioun, fir ze kucken, ob et net aner Systemer gëtt, déi ee vläicht kéint aféieren. Do gëtt et Modeller a Frankräich, et gëtt e belsche Modell, wou meng perséinlech Meenung ass, dass mer awer sollen dorop oppassen, dass mer net ze vill en zentralistesche System opbauen, wou alles géif an d'Stad kommen, wäit ewech an eng zentral Verwaltung.

Ech menge schonn, dass am Prinzip den Office social vun enger Gemeng awer déi Stell ass, déi am nooste beim Eenzelnen ass an déi och am schnellsten an am wirk-samsten do eppes ka maachen. Mä wéi gesot, et ass an der Regel un der Regierung, fir do ze kucken, ob et net aner nach besser Systemer gëtt.

Mir mengen, dass mer hei awer par rapport zu der Ist-Situatioun vun haut op jidde Fall eng kloer Verbesserung bréngen, och notam-ment fir Leit, déi aus sozialen Ursaache Problemer hu beim Bezuele vu Rechnunge vu Stroum oder Gas.

Bei dem Gesetzesprojet hu mer och nach en ale Bekannten erëmbegéint, deen eis scho beschäftegt huet bei aneren Texten an der Wirtschaftskommissioun. Et ass d'Fro vun der Publikatioun vun Normen, vun obli-gatoreschen Normen, déi sech och um Ter-rain dann applizéiere musse kënnen.

Do ass de Statsrot erëm an eng relativ pu-ristesch Haltung zrëckgefall, déi en entre-temps bei anere Gesetzer emol schonn zwëschenzäitlech opginn hat, a wou e seet, dat do geet net, all Norm muss integral am Mémorial veröffentlecht ginn.

Woubäi, wann een den Text vun der Verfas-sung, den Artikel 112 kuckt, da steet do guer net dran, dass ee muss den Text inte-gral am Mémorial publizéieren. Dat steet an engem Ausféierungsgesetz dran. A mir mengen also, wann do elo ëmmer méi Schwieregkeeten opdauchen a wa mer elo an all Deelberäich, wou et technesch Norme gëtt, ëmmer eng aner Regelung hunn, da wär et sécherlech wënschens-wäert, wann d'Regierung sech kéint opräfen, fir vläicht eng Revisioun ze proposéiere vum allgemengen Text iwwert d'Publikatioun vun Normen, vu Gesetzestexter a vu Regle-menter. Do géife mer de Problem propper geléist kréien. Dat ass hei am Kader vun dem Text immes schwiereg.

Fënneften a leschte Punkt, deen ech ervir-sträiche wollt, ass, dass mer selbst-verständlech an deem heiten Text och dee sougenannte Fonds de compensation bäi-behalen. Dee Fong - dat betounen ech nach Kéier - soll et erméiglechen, fir eng Rei vu finan-zielle Kompensatiounen ze gi fir gesetz-lech Obligatiounen, déi am Kader vum Ser-vice public operluecht ginn. Souwäit ech weess, ass d'Regierung do och a Verhand-lung mat der Europäescher Commissioun, wat den Detail vum Fonctionnement vun deem dote Fong ugeet. Et ass un engem Règlement grand-ducal, fir dann och de Re-gime vun deem dote Fong an Zukunft ze re-gelen.

Als Rapporteur wëll ech nach allgemeng en Appel un d'Regierung maachen, fir déi vill Ausféierungsbestëmmungen, déi an deem heiten Text dra sinn, net jorelaang schleefen ze loosser, mä ze probéieren, de politesche Wëllen un den Dag ze leeën, fir se esou schnell wéi méiglech ze huelen, well se bal alleguerten awer vun Notze sinn. Ech géif net soen, dass der do vill derbäi wären, wou ee seet, déi kéint ee jorelaang schleefen doen. Do sinn awer noutwendeg Prezisiou-nen ze ginn, wat déi praktesch Ëmsetzung vun deene Gesetzestexter ugeet, an duerfir den Appel un d'Regierung, fir sech déi néi-deg Moyenen ze ginn, fir d'Ëmsetzung vun den Ausféierungsbestëmmungen ze maa-

chen. Dat gëllt, wéi gesot, besonnesch fir déi Affär vun der Ursprungskennzeech-nung, dat gëllt awer och fir aner Ausféie-rungsreglementer, déi ganz wichteg sinn.

Zum Schluss wollt ech nach ee Virschlag maachen, de Virschlag nämlech un d'Re-gierung, fir ronderëm dëst Gesetz a seng praktesch Konsequenzen eng breet Opklä-rungscampagne ze maachen. Dat schéngt mer immens wichteg ze sinn, well ee jo awer spiert, dass besonnesch d'Leit dobausse veronséichert sinn. Si liesen, de Maart geet op, du kanns elo dāi Stroum an dāi Gas ier-gendwou akafen, an u sech weess keen esou richteg, wat ass. Kee weess esou rich-teg, wat sech wierklech ännert, wat eigent-lech seng nei Rechter ginn, well et sinn an deem Gesetzesprojet ganz vill Rechter fir den Endclient virgesinn.

Duerfir géif ech proposéieren, dass d'Re-gierung sech do och soll déi néideg Mëttele ginn, fir déi Informatioun a Berodung ze maachen, vläicht net nëmme fir de klengen Endkonsument, mä och fir eng Rei vu klen-gen Acteuren an deem ganze Beräich, an déi dote Fro vun enger objektiver Informa-tioun iwwert d'praktesch Konsequenze vun deenen heiten Texter net private Firmen ze iwwerloossen. Ech mengen, dat ass eng no-bel Aufgab vum Stat, fir déi dote Berodung duerchzeféieren.

An et wär, mengen ech, och net schlecht, wann een eis Konsumenteschutzorganisa-tioun mat an dat Ganzt do kéint eranhue-len. Et ass och eng Aufgab vun hinnen, déi Informatiounen do un de Verbraucher wei-derzerechen.

An deem Sënn géif ech lech als Rapporteur bieden, déi zwee Gesetzestexter ze stëm-men, an ech brénge gläichzäiteg och den Accord vu menger Fraktioun an.

Merci!

» **Plusieurs voix.** - Très bien!

» **M. le Président.** - Merci, Här Bodry. Als éischt Riednerin ass ageschriwwen déi honorabel Madame Françoise Hetto. Ma-dame Hetto!

Discussion générale

» **Mme Françoise Hetto-Gaasch** (CSV). - Här President, Dir Dammen an Dir Hären, fir unzefänke wëll ech dem Rap-por-teur, dem Alex Bodry, wierklech Merci soen an him félicitéiere fir säi komplette Rapport. Et ass en héich techneschen Dossier an de Rapporteur huet lech do schonn eng ganz Partie vun Detailer zerwéiert. Ech wäert dann a menger Interventioun net op weider Detailer agoen.

Déi zwee Projekte ginn hei zesumme presen-téiert, well se vun der gesetzlecher Struktur hir d'selwecht opgebaut sinn, mä si gi jo awer onofhängeg vuneneen ofgestëmmt. D'Liberaliséierung vum Energiesecteur stäipt sech op europäesch Direktiven: wat elo d'Liberaliséierung vum Elektreschen ubelaangt, op déi europäesch Direktiv 2003/54 vum 26. Juni 2003 an op déi eu-ropäesch Direktiv 2005/89 vum 18. Januar 2006; wat dann elo de Gas ubelaangt, op d'europäesch Direktiv 2003/55 vum 26. Juni 2003, betreffend d'allgemeng Regele fir de Bannemaart vum Gas, an op d'europäesch Direktiv 2004/67 vum 26. Abrëll 2004, déi d'Approvisionnementssécherheet vum Gas garantéiert.

Mir hei zu Lëtzebuerg si gehalen, dës Direk-tiven esou séier wéi méiglech ëmzesetzen. Alle béid schreiw se sech an d'Politik vun der Europäescher Commissioun an, déi e regelrechte Bannemaart fir d'Energie kreéiere wëllt.

Dës Liberaliséierung huet zwee grouss Ziler an och Prinzipien.

Et geet ëm d'Aktivitéite vun der Produktioun a vun der Fourniture, déi liberaliséiert ginn. Si gi ganz kloer getrennt vun de Réseausak-tivitéiten, also dem Transport an dem Ver-deele vun der Energie, déi natierlech Mono-pole bleiwen, an déi staarke Contrainten ënnerleien an net liberaliséiert ginn. D'Akti-vitéit vum Gestionnaire de réseau bleift de Service public, deen duerch den ILR regu-léiert an och kontrolléiert gëtt. D'Produktioun an d'Fourniture si kommerziell Aktivitéiten, déi elo dann der Konkurrenz ënnerleien.

Zweetens, all Betrib an zënter dem 1. Juli och elo all Privatstot dierfen hiren Energie-fournisseur fräi wielen.

Här President, Dir Dammen an Dir Hären, Energiepolitik ass och Wirtschaftspolitik. D'Energiepolitik dierf eis Wirtschaft net iw-erbelaaschten. Si dierf net grouss Betriber dovunner ofhalen, sech hei bei eis ze im-plantéieren. Am Géigendeel, si muss dem Wirtschaftsstanduert Lëtzebuerg entgéint-kommen, well eng gesond a kompetitiv Wirt-schaft steet fir sécher Aarbechtsplazen.

Fir kompetitiv ze bleiwen an eng nohalteg Energiepolitik ze bedriewen, brauche mer en Energiemix aus Uelech, Gas, Stroum an erneierbaren Energien. Energieaspuerunge musse weider propagéiert an och ën-nerstëtzt ginn, an do kann am Fong geholl jiddfer Eenzelne säin Deel dozou bäidroen. Luuchten net muttwëlles brenne loosser, Computer an Televisioun komplett ausmaa-chen an net am Stand-by loosser, an Ener-giespuermesuren investéieren, säin Haus a seng Wunneng seriö isoléieren, fir nëmmen dës ze nennen. All dës Moosssname kom-men net nëmmen eiser Ëmwelt zegutt, mä och dem Eenzelne sengem Portmonni.

Här President, Dir Dammen an Dir Hären, duerch d'Gas- an d'Stroumliberaliséierung kann also zënter dem 1. Juli jiddereen déci-déieren, bei wem hie säi Stroum respektiv säi Gas akeeft. Jidderee muss fir sech déci-déieren, wat fir hie méi wichteg ass: de Präis, d'Sécherheet, d'Ëmwelt? Et geet also, wéi bei esou ville Saachen op der Welt, och hei ëm d'Suen. An der Präisstruktur fir den Endverbraucher maachen d'Netzkäschte ronn 50% vum Präis aus, 10% falen u Steie-ren an u Kompensatiounstax un, et bleiwen also eng 40% op déi de Fournisseur en Afloss huet, an do wäerten d'Écarten të-schent deenen eenzelne Fournisseure wuel net esou grouss sinn.

De Client sicht jo niewent dem Präis bestëmmt och e fiabele Service an d'Sé-cherheet vum Approvisionnement. Wourob-ber allerdéngs kee vun eis en Afloss huet, dat sinn déi staark Präishaussë vun den eenzelne primären Energieressourcen, déi mer zënter 2005 kennen, sief et Gas, Pétrol oder d'Kuel. De wirtschaftleche Wuesstum vu China an Indien huet dozou bäigedroen, dass weltwäit déi energetesch Besoinen an d'Luucht gaange sinn an domadder natier-lech d'Präisser. Weltwäit verbrauche mer haut duebel esou vill Energie, wéi dat nach an de 70er Joren de Fall wär. A bis 2030 soll dëse Verbrauch nach emol ëm d'Halschent klammen, woubäi déi fossil Brennstoffe déi wichtegst Energiequelle bleiwe wäerten. Er-neierbar Energië maachen am Moment nëmme 14% an d'Atomenergie 7% vum glo-balen Energieverbrauch aus.

Elo ass et awer esou, dass kloer gewosst ass, dass mer nach just fir 40 Joer Äerdue-lechreserven, fir 70 Joer Äerdgas a fir 95 Joer Kuel hunn. Weltwäit si mer an der Ue-lech- a Gasversuergung vu politeschen a wirtschaftlechen onstabile Fuerderregiou-nen ofhängeg. D'Europäesch Unioun ass ee vun deene weltgréissten Importateure vun Uelech, Gas a Kuel. Eis Energieofhängeg-keet klëmmt, dem Grénge Buch vun der Commissioun no, op 70% am Joer 2030. Mir mussen hei an Europa eng gemeinsam Sprooch schwätzen a Saachen Energie. Duerfir ass et och esou wichteg, dass mir en europäesche Bannemaart fir Stroum a Gas hunn. Déi deementspriedend Direktive mussen ëmgemat ginn, a wa mer haut de Mëtteg dëse Projet de loi stëmmen, da si mer um richtege Wee.

D'Importer vun de primären Energië wäer-ten aus ëmmer méi enger klenger Zuel vu Länner kommen. Duerfir musse mer an Zu-kunft mat méi héijen Energiepräisser rech-nen. Déi elektresch Energie, déi jo op Basis vun de Primärenergien hiergestallt gëtt, sui-véiert de Präismouvement natierlech mat, well de Brennstoff e wesentleche Bestand-deel vun de Käschte vum Elektreschen aus-mécht. Do derduerch kënnen de Clienten hir Erwaardungen, dass d'Präisser géife fa-len, eventuell net erfüllt ginn.

Mir mussen allerdéngs wëssen, wat fir eis méi wichteg ass: de Präis oder d'Sécher-heet am Approvisionnement oder d'Ëmwelt, oder ieren déi dräi. Mir sinn eis eens, dass d'Netz muss stabil bleiwen, an do kënt eng wichteg Aufgab op de Coordinateur des pé-rimètres d'équilibre zou. Hie muss déi Aus-gläichsenergie liwwere vun deem, wat zu all Moment un Demande vum Client kënt. Keng einfach Aufgab, wou mer all just kë-nnen hoffen, dass mer keng allze grouss Iw-werraschung wäerte kréien.

Ech erlabe mer och am Numm vu menger Fraktioun drop hinzewisen, dass et fir eist klengt Land wesentlech ass, dass mer eng national Netzgesellschaft behalen, déi d'Sé-curité d'approvisionnement an d'Qualitéit vun der Infrastruktur garantéiert. Mir be-grëssen et och, dass d'Gesetz Léisunge virgesäit, fir dass Familljen, déi oui eege Verschëlden an Zahlungsverzuch gerode sinn, kënne Gas an Elektresch kréien, an dat sief et iwwert den Office social oder sief et iwwert d'Installatioun vun engem Comp-teur à prépaiement.

Här President, Dir Dammen an Dir Hären, dat wier et gewiescht fir mäin Deel. Ech soen lech Merci fir d'Nolauschteren a brén-gen heimat den Accord vu menger Frak-tioun zu deenen zwee Projekten.

» **Plusieurs voix.** - Très bien.

» **M. le Président.** - Merci, Madame Hetto. D'Wuert huet elo fir d'DP-Fraktioun d'Madame Anne Brasseur.

» **Mme Anne Brasseur** (DP). - Här Pre-sident, Dir Dammen an Dir Hären, fir d'éischt wëll ech e puer Commentairen zu der Procédure maachen, an där mer ons hei befannen. Déi Direktiven, déi mer haut ëm-setzen, si scho säit zéng Deeg a Kraaft, an eréischt haut setze mer se an onst Gesetz ëm. Et ass net fir d'éischt, dass mer Retard-en hunn, a mir si jo leider eent vun deene Länner, déi déi meeschte Retarden hunn am Ëmsetze vun Direktiven.

Den Energieminister huet d'Kommissioun gefrot, et soll een esou séier wéi méiglech nach virun der Sommervakanz dës Projekte stëmmen, fir dass mer keng exorbitant Stro-fen ze bezuele kréichen. Strofen, déi vu Bréissel kommen, wann een d'Direktiven net zur Zäit an d'Nationalrecht ëmsetzt. D'Kom-missiou ass och deem Wunsch nokomm, an duerfir stëmmen mer dann haut dat Ge-setz.

Ech muss lech awer soen, dass dat ënner Bedéngunge geschitt, déi am Fong engem Parlament net würdeg sinn! Et läit net un der Commissioun, huet de President gesot, mä eréischt leschte Freideg hu mer den Zou-sazavis vum Conseil d'État kritt, deen eng extra Sitzung nach huet missen aleeën, fir déi zousätzlech Amendementer ze analy-séieren, an e Méindeg war d'Kommissioun zesummen, fir den Avis vum Conseil d'État ze kucken, fir dann de Rapport ze finaliséie-ren.

Dat ass net üblech, well, Här President, et gëtt eng Regel hei am Haus, dass mer mus-sen déi Woch virdrun de Rapport an der Commissioun ugeholl hunn, fir dass de Pro-jet hei an de Plenum ka kommen. Or, dës Kéier ass eng Exceptioun gemaach ginn, a wann dat iwwerhaapt méiglech war, dann ass et, well an der Commissioun vun der Economie an der Energie exzellent Aar-becht gemaach ginn ass.

Dat ware bal 20 Sitzungen, an ech wëll hei ausdrécklech dem Président-Rapporteur, dem Här Bodry, villmools Merci soe fir déi Aart a Weis, wéi hien déi Debatte geleet huet. Hien huet dat gemaach mat enger grousser Rou, mat enger grousser Sach-kenntnis, well soss wiere mer net an deenen Délaien hei derduerchkomm. Et ass be-stëmmt net der Commissioun hir Schold, wa mer elo mussen dëse Vote iwwert de Knéi briechen!

Ech géif och de Vertrieeder vun der Regie-rung villmools Merci soen, deenen Hären Eyschen an Hoffmann, déi duerch hir Kom-petenz ons gehollef hunn, duerch déi ganz schwéier Matière derduerchzekommen, eng Matière, déi äusserst komplizéiert ass um technesche wéi och um juristesche Plang.

Elo zum Schluss maache mer e Projet an der Hetz, an et si leider nach eng ganz Rei Froen net beäntwert. Den Energieminister huet all Kéiers op Wonsch vun der Kommis-sioun Äntwerte ginn, Äntwerten, mat deen-ech heiandsdo net konnt averstane sinn, an a verschiddene Punkten deelen ech seng Approche net.

Mä een, deen net op d'Froe vun der Kom-missiou konnt äntworten an deen enttäu-schend war a senge Prestatiounen an der Commissioun, dat war nun eemol den In-nenminister! An ech bedauern et, dass den Innenminister de Mëtteg net hei ass.

» **Plusieurs voix.** - Do ass en!

» **Mme Anne Brasseur** (DP). - Hien huet sech...

(*Interruptions, hilarité et coups de cloche de la Présidence*)

» **M. le Président.** - Madame Brasseur, fuert weider!

» **Mme Anne Brasseur** (DP). - Hien huet sech duerch groussen Immobilismus ausgezeecht. Haut sollen nämlech Ge-setzer gestëmmt ginn, bei deenen eng ganz Rei Gemengen direkt betraff sinn an all déi aner Gemengen indirekt. An déi Gemenge mussen elo dës Direktiven applizéieren. D'Gemengegesetz awer - an den Här Bodry

huet och schonn drop higewisen - erlaabt et a verschiddene Punkten net, déi Ëmsetzung virzehuelen, an dofir hu mer hei zwee Gesetzzer, déi sech widderspreichen.

Ech fannen et skandaléis, dass e Member vun der Regierung e Projet de loi déposiëiert, dee contraire ass zu Dispositiounen vun engem anere Gesetz, an dass dann d'Regierung an deen zoustännegen Minister iwwert dat anert Gesetz dat net an den Dé-laien ännert! An esou engem Fall misst dach déi bestehend Gesetzgebung, dat heescht d'Gemengegesetzgebung, adaptéiert ginn.

De Conseil d'État seet dat och a sengem Avis vum 24. Abrëll 2007, an ech zitieren: «Les communes risquent de se trouver dans une impasse et le Conseil d'État voudrait dès à présent attirer l'attention du législateur sur la nécessité de prévoir des modifications concomitantes dans la législation communale afin d'éliminer ces contradictions et incompatibilités et d'adapter cette législation à l'évolution et aux conditions de l'environnement économique et institutionnel européen et international.»

De Conseil d'État seet also a sengem Avis, et muss concomitant kommen, dat heescht, gläichzäiteg. Dat misst also och haut geschéien. Or, dat ass leider net de Fall.

An de Syvicol seet a sengem Avis heizou: «Du point de vue des communes une attention particulière devrait dès lors être accordée, dans la transposition en droit national des directives européennes précitées, à l'adaptation du secteur communal au nouveau contexte concurrentiel. En effet, pour des raisons bien connues, les défis que pose cette nouvelle situation sont autrement plus difficiles à relever pour des entités publiques que pour des sociétés privées. Or, force est de constater que les priorités du Gouvernement sont ailleurs.»

Dat heescht, de Syvicol selwer seet, dass d'Prioritéite vun der Regierung anzwousch anescht sinn, wéi hei d'Gemengegesetzgebung ze adaptéieren, an dat ass fir eis inadmissibel! De Syvicol seet weider, dass eng Partie Dispositiounen vun deem Gesetz sech maachen «au détriment du secteur communal».

Mä den Innenminister weist sech hei, genee wéi och an aneren Domänen, wirklech änderungsresistent. Hie gëtt zwar jiddferengem Recht, mä en ass änderungsresistent. Och an aneren Domänen, wou mer e gesinn hunn. Hie léisst mat sech diskutéieren, mä et geschitt awer näischt. De 6. November 2006 hate mer eng Réunion...

(Interruption)

» M. le Président. - Här Gira, et ass net ganz korrekt, fir einfach hei Commentairen an d'Ried vun der Madame Brasseur eranzetrotzen!

Madame Brasseur, fuert Dir weider!

» Mme Anne Brasseur (DP). - Jo.

De 6. November 2006 hate mer - ech mengen, et war op Initiativ vum Energieminister - eng Réunion am Energieministère, wou den Energieminister war, zesumme mam Innenminister, a mat deene siwe Gemengen, déi Distributeur vum Elektresche sinn. Den Innenminister krut eng Rei vu Froen gestallt, huet dat ganz interessant fonnt a gesot, e géif sech dat unhéieren an do wieren eng Rei Problemen, mä hie géif emol kucken an da géif hie jo gesinn, wéi ee Léisunge géif maachen.

Well d'Gemengen hunn hien deemools schonn drop opmierksam gemaach, dass Problemer do si mat dem Ëmsetze vun der Direktiv, wat d'Kontabilitéit ubelaangt, mat der Ëmsetzung vun der Direktiv, wat aner Dispositiounen ubelaangt, an notament d'Activité commerciale an och besonnesch wat d'Personal ubelaangt.

Den Innenminister huet awer duerno net bougéiert. Dobäi waren déi Problemer jo awer spéitstens säit dem Dépôt vum Projet de loi bekannt - enfin scho virduen, an den Här Bodry huet dat och opgeworf, well déi Direktive virduen hu jo och schonn eng Rei Obligatiounen de Gemenge ginn, déi déi net konnten erfëllen.

Ech fannen et inadmissibel, dass mer elo sollen e Gesetz stëmmen, wat engersäits

d'Gemengen obligéiert, et ëmzesetzen, an anerersäits awer d'Gemengen d'Moyenen net kréien, fir dat ze maachen!

Den ILR, de Régulateur, deen elo jo schonn d'Tarifer vun der Utilisation vum Réseau muss accordéieren, dee muss jo en Avis dozou ginn. A bei der Stad Lëtzebuerg huet hien a sengem Avis de 7. Juni 2007 Folgendes gesot: «Malgré les efforts considérables de la Ville de Luxembourg concernant la simulation d'une comptabilité commerciale, l'Institut souligne le manque de transparence à cause de la non-conformité aux prescriptions légales.»

Déi non-conformité aux prescriptions légales kënn dohier, well just eng Simulatioun opgrond vun der Comptabilité camérale gemaach gëtt, déi mer musse maachen als Gemeng, well dat esou am Gemeengegesetz steet. An da gëtt eng Simulatioun gemaach fir eng Comptabilité commerciale. Den ILR seet: Bon, Dir gitt lech vill Méi, mä et ass awer net dat Richtegt. Esou dass d'Texter missten dorun ugepasst ginn.

Wann ech esou op d'Procédure insistéiert hunn, Här President, dann ass et fir ze ënnersträichen, dass mer hei an inakzeptabele Konditiounen esou wichteg Gesetzzer solle stëmmen. Ech wëll och nach eng Keier op d'Inaktioun vum Innenminister hiweisen, dee wirklech d'Gemengen hei am Stach léisst.

Här President, Dir Dammen, Dir Hären, bei der Diskussioun iwwert déi Direktiven, déi mer hei ëmsetzen, iwwert déi zwee Gesetzesprojeten, déi mer hei votéieren, muss ee sech virun allem emol eng Fro stellen. Dat ass: Wiem bréngt déi Liberaliséierung eppes? Bréngt et dem Eenzelnen eppes? Bréngt et den Distributoren eppes? Bréngt et dem Land eppes?

Fir deen eenzelne Consommateur, do muss ee sech wirklech d'Fro stellen. D'Brësseler Kommissioun ass jo dovun ausgegangen, dass d'Energien eng Wuer sinn, an als Wuer musse se fräi handelbar sinn an op de Maart kommen. Bei deene grouse Clientë kann dat och nach zoutreffen. Mä bei deem eenzelne Client muss ee sech d'Fro stellen. Bei deene grouse Clientë si jo och schonn d'Direktiven a Kraaft.

Beim klenge Client kënn et sécher och elo zu méi Transparenz duerch dëst Gesetz. Mä ech froe mech awer, wat dee klenge Client domat kann ufänken, well dee sech an dëser Matière iwwerhaupt net erëmfënnt. Ech ginn dem Här Bodry Recht: Et muss eng Opklärungscampagne gemaach ginn. Mä ech froe mech, ob den Opwand net disproportionéiert ass par rapport zum Resultat, well ech mengen, dass am Endeffekt dee klenge Consommateur vum Ëmsetze vun dëser Direktiv näischt huet. De Service au client gëtt och vläicht besser, well méi Konkurrenz do ass. Dat sinn dann d'Avantagen.

Et freet ee sech awer, wat fir eng Avantagen et nach gëtt. Um Präis gëtt et bestëmmt keen Advantage. D'Madame Hetto huet scho gesot, dass d'Präisser kaum wäerten erofgoen, esou dass fir den eenzelne Consommateur d'Präisser net méi niddreg ginn. D'Chambre de Travail schreift och an hirem Avis, dass et keng Korrelatioun gëtt tëschent dem Gaart vun der Liberaliséierung an dem Marché um Niveau vun de Präisser. De Präis, dee setzt sech jo zesummen aus 50% Infrastruktur, dat heescht Réseauskäscht mat Duerchleedungskäscht, plus 10% Taxen a Redevancen, sou dass nach 40% bleiwe fir d'Matière - Stroum oder Gas - an d'Marge bénéficiaire vum Distributeur.

Do bleift also net vill Sputt, wann ee weess, dass de Präis vun der Energie - vum Stroum a vum Gas - jo awer net hei zu Lëtzebuerg gemaach gëtt. Mir si wirklech kee Producteur, oder nëmme ganz weëneg, esou dass mer dorop keen Afloss hunn. Dat Eenzezt, wat ee ka maachen, dat ass eng dynamesch Akafspolitik, sech dofir Strukturen ginn. An dann nach sinn déi Fluktuationen um Präis méi wéi geréng, well de Präis diktiert gëtt vum internationale Marché. An dat bezitt sech op d'Matière première.

De Präis gëtt och diktiert vun der Nofro. Déi wäert an deenen nächste Joren nach dauernd an d'Luucht goen. Am Moment brauch e Stot am Duerchschnitt 700 Euro d'Joer, fir d'Elektresch ze bezuelen. Do wäerten et och keng grouss Fluktuationen an Zukunft ginn. Au contraire, d'Präisser wäerten, bedéngt duerch de Weltmarché, éischter eropgoen.

Fälschlecherweis, wann een déi Debatt hei iwwert d'Liberaliséierung beim Stroum a beim Gas féiert, da gëtt Referenz gemaach op d'Telekommunikatiounen. Or, beim Telefon ass et eppes ganz anescht, well do handelt et sech net ëm eng Wuer, mä do handelt et sech ëm Dëngschtleeschungen. Dëngschtleeschungen, op déi ee kann duerch eng Organisatioun an duerch aner

Strukturen Afloss hunn. Mä hei beim Stroum a beim Elektreschen ass et de Weltmaart, deen d'Präisser diktiert, a bestëmmt net deen Eenzelnen. À moins, dass ee seet: D'Duerchleedungskäscht, déi mussen erofgoen. Dat huet natierlech eng Influenz op de ganze Réseau an op d'Struktur vun onsem Réseau. Awéiwäit een do kann d'Käscht drécken, ouni dass et op d'Käscht vun der Sécherheet geet, dat ass natierlech eng Fro, déi ee sech awer muss stellen.

D'Fro also, wiem d'Liberaliséierung vum Energiesektor eppes bréngt, dorop muss een äntwerten, dass et dem eenzelne Consommateur mat Sécherheet näischt wäert bréngen, ausser dass hien elo de libre choix huet. Mä hien huet doduerch awer och Problemer, fir sech erëmfänken, well et eng äusserst komplizéiert Matière ass.

Wann een och d'Gesamtconsommation vun der Energie kuckt, da sinn der vun dëser Direktiv iwwert de Stroum am Fro, wat d'Quantitéit ubelaangt, weëneg Betrag, well de Gros vum Stroum gëtt jo vu Mëttel- a Groussclientë bezunn. Dat mécht 84% vum Marché aus. Sou dass mer hei nëmme vu 16% vum Marché iwwerhaupt schwätzen. Sou dass ech mengen, dass dës Direktive beim Endclient weëneg Influenz wäerten hunn.

(M. Jos Scheuer prend la Présidence)

Eng zweet Fro, déi ee sech muss stellen, nieft der Fro: Wiem bréngt et eppes als Consommateur?, ass: Wat bréngt dat heite Lëtzebuerg? Wat bréngt et dem eenzelnen Distributeur?

Et ass am schrëffleche Rapport vum Här Bodry schonn ervirgestrach ginn, dass mer hei zu Lëtzebuerg zwee grouss Stroumdistributoren hunn - dat ass d'Cegedel an d'Sotel -, an dass mer dernieft nach siwe Gemengen hunn an ee Privatsdistributeur. Bei de Gemenge sinn dat d'Gemengen Dikrech, lechternach, Esch, Ettelbréck, d'Stad Lëtzebuerg, Stengefort a Veianen. De Privatsdistributeur ass zu Miersch.

Ech wëll drun erënneren, dass mer bis viru kuerzem, Här President, hei nach e puer méi Privatsdistributoren haten, kleng Distributoren. Do erënneren ech ganz gären un d'Distribution vum Useldeng, déi d'Madame Georges Marque während Jorzéngte gefouert huet an domat eng Entreprise familiäre iwwerholl huet. Mä déi hunn entretemps hir Rechter un d'Cegedel ofginn.

Mir hunn also zurzäit zéng Distributoren hei am Land. Wann ech soen zéng, dann ass et, well eng Partie vun deene lokalen Distributoren wäerte verschwannen, well se et guer net fäerdeg bréngen, den Obligatiounen gerecht ze ginn, déi hei an dëse Projet-de-loië stinn, déi an den Direktive stinn.

Beim Gas, do hu mer nieft der Soteg, déi Gestionnaire vum Transportréseau ass, zwou Gemengen als Distributeur, an zwar d'Stad Lëtzebuerg an d'Stad Diddeleng. Dann hu mer nach zwou Gesellschaften: Luxgaz a Sudgaz. Fir déi kleng Distributoren wäert et also an Zukunft bal onméiglech sinn, fir sech nach virun op deem Marché ze behapten. «Au détriment des communes», schreift de Syvicol a sengem Avis.

D'Applikation vun den Direktive féiert zu enger ganzer Rei vu komplizéierte Prozeduren. Et muss ee sech och froen, ob se am Sënn si vun der Simplification administrative. D'Stad Lëtzebuerg huet eng Etüd maache gelooss, fir ze kucken, wat se brauch - si oder eng Gesellschaft, déi hir dobäi hëlleft -, fir déi heiten Direktiven elo ëmzesetzen. Do bräicht ee 26 Fachleit - 26 Spezialisten - zousätzlech, fir dat ze maachen; ofgesinn dovun, dass d'Informatik och muss enorm adaptéiert ginn, wat och e ganz héije Käschtépunkt wäert mat sech bréngen.

Erlaabt mer, Här President, e puer Wuert iwwert d'Stad Lëtzebuerg ze soen, wéi do d'Distribution ass, wat den Impakt ass. Am Stroum huet d'Stad Lëtzebuerg 1.748 km Réseau. Et gëtt 1.194 Trafoen an et gëtt 61.000 Clienten. Fir de Service um Bierger an un de Betriber oprechtzeerhalen, brauch een dofir 111 Mataarbechter.

Am Gas ginn et fir d'Stad Lëtzebuerg an d'Gemenge Stroossen an Hesper, déi un de Reseau vun der Stad Lëtzebuerg ugeschloss sinn, 416 Kilometer mat ronn 27.000 Clientë mat engem Personal vun 59 Mataarbechter. Da kënn nach d'Ofwécklung vum ganze Geschäft, den Akaf an de Verkauf vun den Energien derbäi. Dat gëtt bei der Stad Lëtzebuerg vun der Privatgesellschaft LEO ofgewéckelt, eng Privatgesellschaft, déi gegrënnt ginn ass vum viregte Schäfferot vun der Stad Lëtzebuerg, fir deenen zwou Direktiven, déi deemools schonn d'application waren, gerecht ze ginn.

Ech wëll hei op dëser Tribün all deenen e grouse Merci soen, déi um Opbau vun dëser Struktur bedeelegt waren, an do virun allem dem Administrateur délégué vu LEO, dem Här Jean-Paul Wagner.

D'Stad Lëtzebuerg huet eng laang Tradition am elektresche Geschäft an am Gas. Zum Beispill ass d'Elektrizitéitswierk 1908 gegrënnt ginn, dat heescht, d'nächst Joer hu mer do de Centenaire. Déi Recetten, déi d'Gemeng domat mécht, déi d'Stad Lëtzebuerg domat mécht, si beträchtlech. Et ass en Ëmsaz vu ronn 200 Milliounen Euro pro Joer, wat gewaltig ass, an do gëtt e Benefiss gemaach a mat deem Benefiss ginn aner Dépense gedeckt, déi net kënne vun aneren Taxe gedeckt ginn. Dat sinn Dépenses, déi den Innenminister - alt nees den Innenminister - als fakultativ betruecht.

Den Innenminister fënnt jo, dass eng Gemeng kee gemeinsamen Transport misst maachen. Den Innenminister fënnt och, dass den Theater eng Fakultéit ass, dass de Conservatoire eng Fakultéit ass oder zum Beispill och d'Beruffspompjeeën, mä dank de Recetten, déi d'Stad Lëtzebuerg huet, dank dem Benefiss aus den Energie kënne mer esou Servicer oprechterhalen.

Ech wëll drun erënneren, dass zum Beispill de Busbetrieb an der Stad Lëtzebuerg en Taux de couverture duerch eege Recettë vun 30% huet. Déi aner Sue musse vun anzwousch hierkommen an déi kommen zum Deel aus dem Benefiss, dee gemaach gëtt am Energiesektor, esou dass een dat och net därerf negligéieren.

Et muss een och soen, dass, fir dat Ganz ze géréieren, d'Stad Lëtzebuerg ronn 200 Leit brauch, well nieft deene Leit, déi am Service...

Bis an d'Rue Beaumont schéngt den Appel gaangen ze sinn, well den Innenminister ass elo erakomm.

(Interruptions diverses et hilarité)

» Une voix. - Très bien! Très bien!

» Mme Anne Brasseur (DP). - Et sinn an der Stad Lëtzebuerg, fir d'Geschäfte vum Gas a vum Elektreschen ofzewéckelen plus d'Leit vun der Recette, vun der Lecture, all déi een dozou brauch, ronn 200 Leit domat beschäftigt. Do muss ee sech wirklech d'Fro stellen, wéi dat an Zukunft geet, well wann d'Vuë vum Energieminister solle Realitéit ginn - a seng Vuë sinn elo grad gedeelt gi vun der Madame Hetto -, dann heescht dat, dass mer ee groussen nationale Réseau kréien an een nationale Gestionnaire de réseau, an da stellt sech d'Fro: Wat mécht d'Stad Lëtzebuerg mat all deem Personal?

Aner Gemenge sinn net an deem Mooss bestraft, mä kënnen awer och bestraft sinn. Et muss ee jo laut Direktiv och d'Activitéite trenne vun der Distribution a vum Réseau, esou dass ee sech wirklech muss froen, wat mer maachen. Wa mer eng national Réseausgesellschaft kreéieren, wou d'Stad Lëtzebuerg mat dra wär, da sinn an der Stad Lëtzebuerg enorm vill kompetent Leit, déi den Know-how hunn, wéi een de Réseau bedreift am Secteur urbain. Et kann ee jo och net op deen Know-how verzichten. Also missten déi Leit an der nationaler Réseausgesellschaft mat kënne schaffen.

De Statut vum Gemeindebeamten, dee mer hei virun engem Joer gestëmmt hunn, schwätzt sech awer dergéint aus, well gesot gëtt, dass, wann d'Gemeng mat enger Aktivitéit ophält, d'Personal awer da muss bei der Gemeng bleiwen an eng aner Affektatioun muss kréien.

Ech muss lech awer soen, dass déi Leit, déi do schaffen, souwuel an der Recette wéi an der Lecture wéi am Stroum wéi am Gas, héich qualifizéiert Ingenieuren, Techniker an Handwierker sinn, déi ee jo net fir aner Aarbechte ka gebrauchen. Déi kann een net zum Beispill fir de Foyer scolaire huelen, fir op d'Kanner opzepassen. Esou einfach ass dat net, an op där anerer Säit brauche mer hiren Know-how.

Do huet den Innenminister de 17. Januar 2007 de Gemenge geschriwwen, wéi d'Situatioun da vun deem Personal wär, an en huet do alles analyséiert an do koum en zur Konklusioun, dass de Congé sans solde net géif goen, well deen op véier Joer limitéiert ass. Da sot e weider, opgrond vun deem neie Statut kënn d'Gemeng deenen och net kënnegen. Si missten dann eng aner Aktivitéit op der Gemeng maachen. E seet och, dass d'Personal net an eng privat Gesellschaft kann transferéiert ginn. Dat heescht also, et kann een nëmmen zur Konklusioun kommen, dass an deem Bréif, deen de 17. Januar vum Innenminister un d'Gemenge gaangen ass, keng Léisung war, well bei all deene Léisungen, déi opgezeecht gi sinn, koum en zur Konklusioun, dass een dat net ka maachen.

Also, säit dem Januar 2007, wou de Minister dat examinéiert a geschriwwen huet, wat een alles net ka maachen, hätt en awer Zäit gehat, Léisunge virzeschloen. De Gemen-gerot vun der Stad Lëtzebuerg huet den 18. Mäerz à l'unanimité eng Motioun ugeholl, wou de Schäfferot invitéiert ginn ass, bei der Regierung ze intervenéieren, fir - an ech zi-téieren: «...à intervenir auprès du Gouver-nement pour adapter les textes législatifs afin de permettre aux communes de rester actives dans le domaine de l'électricité et du gaz et de garantir l'emploi de l'ensemble de leurs salariés».

De Schäfferot vun der Stad Lëtzebuerg hat och e puer Entrevuë mam Innenminister. Och doropshin ass näischt erfollegt. Mir hunn nach ëmmer keng konkret Virschléi. Well mer awer der Meenung sinn, dass mer hei muss virukommen, muss d'Gesetzge-bung vun de Gemengen adaptéiert ginn, wéi ech dat scho virdru gesot hunn.

De Conseil d'État seet och, dat misst ge-schéien de façon concomitante. Vu dass den Innenminister awer seng Hausaufgab net gemaach huet, begrëissen ech et, dass eis Kollegee vun der grénger Fraktioun, de François Bausch an de Camille Gira, souwéi vun der DP-Fraktioun de Paul Helmingen an de Claude Meisch eng Proposition de loi ebe virgeluecht hunn, presentéiert hunn, fir just op déi Punkten anzegoen, wou den In-nenminister leider seng Hausaufgab net ge-maach huet. Duerfir ass et ze begrëissen, dass dat geschitt ass.

Den Här Bodry bedauert, dass dat net an der Kommissioun gemaach ginn ass. An der Kommissioun hu mer x-mol rappeléiert, dass solle Léisungen hei fonnt ginn, an an der Kommissioun koume mer selwer zur Konklusioun, dass een net soll déi Gesetzer, déi haut debattéiert ginn iwwert d'Ëmsetze vun der Direktiv, amendéieren - wat de Conseil d'État och gesot huet -, mä dass misst eng Ännerung virgeholl ginn um Ge-mengegesetz, an dat ass jo och mat där Proposition de loi geschitt.

Ech wär frou, vu dass den Innenminister elo heihinnerkomm ass, ze héieren, wat dann d'Stellung vun Innenminister zu dëser Pro-position de loi ass, déi mer dach esou séier wéi méiglech missten duerchhuelen, fir d'Gemengen iwwerhaapt an d'Lag ze ver-setzen, dës Direktiven ëmzesetzen.

Mir stëmmen haut e Gesetz an dat Gesetz sollen dann d'Gemengen ëmsetzen an d'Gemenge kënnen et net ëmsetzen, well d'Gemeengegesetzgebung dergéint ass.

Nieft de Froen, wat d'Liberaliséierung bréngt, Här President, stellt sech och eng Fro vun der Sécherheet vum Approvisionnement, der Sécherheet vum Approvisionnement fir deen Einzelnen. Dass déi net ëm-mer ginn ass, dat ass technesch bedéngt, a mir haten nach virun e puer Deeg - ech mengen, et war e Sonndeg den Owend - eng Pann am Süde vum Land, vun där Ver-schiddener betraff waren. Virun e puer Wo-chen ass dat och an der Stad Lëtzebuerg virkomm. Esou Panne wäerte leider nach ëmmer geschéien.

Fir dass et awer net nach méi schlëmm gött, muss ee wirklech alles drusetzen, dass ons Netzer fiabel sinn, an duerfir ass den In-vestissement esou héich an duerfir befanne mer eis jo och hei an engem Marché régulé an net op engem fräie Marché.

Wat d'Sécurité de l'approvisionnement awer vu baussen ubelaangt, esou hänke mir als Lëtzebuerg zu honnert Prozent vum Aus-land of, well mir jo kaum hei eng Produk-tioun hunn. An d'Energiedemande, déi wäert nach klammen.

D'Madame Hetto ass an hiner Stellungnahm dorop agaang, dass bis 2030 nach mat 50 bis 60% méi Energiebedarf muss gerechent gi weltwäit. Hei an Europa muss mer 50% vun onser Energie importéieren, an an Zu-kunft wäerten dat bis 70% ginn.

Mir müssen awer als Europa fäerdeg brén-gen an och als Land fäerdeg bréngen, fir kompetitiv ze bleiwen, fir d'Energiefro an de Grëff ze kréien. Dat mécht een duerch Di-versifizéierung; dat mécht een duerch nei Energiesourcen an do muss ee vill an d'In-novatioun stiechen. Dat mécht een duerch Partnerschafte vu Producteuren, mä och Partnerschafte mat Länner, déi Transitlänner vun der Energie sinn. Ech wäert net am De-tail op dës Debatt agoen. Déi hu mer ge-féiert am Dezember, wéi mer iwwert d'Ener-giefro hei debattéiert hunn.

Zu den Alternativennergien awer nach eng Remarque. Mir muss jo awer d'Capacités, déi mer brauchen, garantéieren, a ver-schidden Alternativennergie sinn net op deem Stand, dass ee se ka garantéieren. Dat ass esou bei der Sonnenenergie an dat ass och esou bei der Wandenergie.

Ech wëll och hei a mengem perséinlechen Numm eng Remarque maachen zur Atom-energie. Mir sinn an enger hyprocriter Hal-tung wat Cattenom ubelaangt. Wat Catte-nom ubelaangt, soe mer Nee fir de Stroum, dee vu Cattenom kënn. Mir wëssen awer, dass ouni Atomstroum d'Luuchte géifen, net nëmmen hei zu Lëtzebuerg, direkt aus-goen. Déi hypocrite Haltung wollt ech awer hei dénoncéieren.

Här President, an der Kommissioun hate mer am Numm vun der DP eng ganz Partie vun Amendementer eragereecht - ech men-gen, et waren der 17, wou der e puer vun der Kommissioun ugeholl gi sinn, déi aner verworf gi sinn. Ech wëll lech a mir den Exercice erspueren, déi verworfen Amende-menter nach eng Kéier hei virzebréngen, well ech jo weess, dass d'Majoritéit se nach eng Kéier géif verwerfen, esou dass ech net méi dorop wëllt zrëckkommen.

Ech wëll nach eng Remarque maachen zu der Applikatioun vun dësem Gesetz. Wann dëst Gesetz zur Applikatioun kënn, da kënn nach zousätzlech Aarbecht op den ILR duer. Den ILR ass am Moment - esou gesinn ech dat weinstens - awer schonn esou mat Aarbecht agedeckt, esou dass dee sécherlech muss opgestockt ginn. Vu dass deem seng Käschten awer selbst-droend musse sinn, kritt dat erëm eng Ré-percussion op de Präis vun all deenen, déi op den ILR zrëckgräifen. An ech wollt awer just froen, wéi d'Regierung dat gesäit, wat d'Entwécklung vum ILR ubelaangt a wéi do d'Répercussion financière dann ass.

Nach ee Wuert zu deene Clienten, déi net kënnen, aus iergendengem Grond, hir Rechnunge vum Stroum a vum Gas bezue-len. Do gött et effektiv Abusen an déi muss een ënnerbannen. Mä déi Leit, déi sozial schlecht dru sinn, do si jo hei Kritäre virge-sinn, an ech sinn och der Meenung - wéi de Rapporteur -, dass ee soll kucken dat iw-ert d'Offices sociaux ze léisen, well déi méi no beim Bierger sinn, wéi iwwer eng na-tional Struktur.

Här President, zum Schluss wëll ech soen, dass d'DP-Fraktioun dës Projets de loi net ka stëmmen, an dat aus véier Haaptgrënn: 1. d'Liberaliséierung vum Stroum- a Gas-marché bréngt deem eenzelne Client näischt; 2. et ass keng Baisse vun de Präis-ser ze erwaarden, dat heescht, de Gas an d'Elektresch ginn net méi bëlleg fir den een-zelne Konsument; 3. d'Gemenge sinn am Moment net an der Lag, d'Gesetz ëmzeset-zen, well verschidden Dispositiounen vun dë-sen Texter hei contraire sinn zu dem Ge-mengegesetz; a 4. wëlle mer mat onsem Vote géint dëse Projet d'Inaktioun vum In-nenminister, fir keen anert Wuert ze gebrau-chen, dénoncéieren.

Ech soen lech Merci.

» **Plusieurs voix.** - Très bien!

» **M. le Président.** - Merci, Madame Brasseur. Den nächste Riedner ass den Här Kox.

» **M. Henri Kox (DÉI GRÉNG).** - Här Pre-sident, Dir Dammen an Dir Hären, och am Numm vun der grénger Fraktioun wollt ech am Ufank vu menger Ausféierung dem Rap-porteur, trotz vläicht deene klenge Remar-quë vun de leschten Deeg an och vun där Remarque vu virdrun, Merci soe fir säi schrëftlechen a mëndleche Rapport. An deem Merci wëll ech awer och speziell de Sekretär vun eiser Parlamentskommissioun mat abezéie souwéi d'Experte vum Wirt-schaftsministère, déi besonnesch an de leschten Deeg e regelrechte Kraaftakt hu misse leeschten, fir dës Gesetzer nach iw-ert de Bierg kënnen ze bréngen. Dobäi hu mir misse sämtlech parlamentaresch Rege-len op d'Kopp geheien.

No deene Mercié kommen ech awer net derlaanscht, meng grouss Enttäuschung auszedrécken, trotz grousssem Aarbechts-opwand, an ech betounen, bei konstruktiv-em Aarbechtsklima vu sämtleche Bedee-legten, iwwert d'Aart a Weis, wéi esou e wichtegt a wäiträichend Gesetz huet missen iwwert de Knéi gebrach ginn.

Vläicht just zur Erënnerung e puer Daten: 19 Kommissiounssätzungen, et gouf scho vum Rapporteur virdru gesot, woubäi beson-nesch déi lescht Sëtzung bal net méi zou-muttbar war an ech de Seriö vun enger par-lamentarescher Aarbecht dach staark a Fro gestallt hunn. Zum Schluss huet ee vu villen Dokumenter kee Blat viru sech méi gesinn. Esou goufen de 25. Juni, no enger Mara-thonsëtzung vun iwwer sechs Stonnen, 60 Amendementer zum Stroumgesetz a 27 Amendementer zum Gasgesetz dem Stats-rot zougeschéckt, mat dem Wunsch an der Bitt, dach wann ech gelift innerhalv vun en-ger Woch säin zweeten Avis ofzeliwweren. Dës 60 respektiv 27 Amendementer waren néideg, well am éischten Avis 12 Opposi-

tions formelles vum Statsrot formuléiert gou-fen.

Esou konnten eréischt de leschte Méindeg, den 9. Juli, den zweeten Avis vum Statsrot analyséiert ginn a gläichzäiteg och de Rap-port, souwuel vum Stroumgesetz wéi och vum Gasgesetz, ofgestëmmt ginn.

Et stellt sech natierlech d'Fro, wien hei seng Hausaufgab an deene leschte Joren net ge-maach huet. Firwat huet misse bis op de leschte Stëppel gewaart ginn, fir esou e Ge-setz ëmzesetzen?

Zënter e puer Joer ass de Stéchdatum vun der vollstänneger Liberaliséierung vum Stroum- respektiv dem Gasmarché bekannt. De Stéchdatum vum 1. Juli 2007 gouf säit Joren ëmmer nees genannt. D'Direktiven 2003/54 zum Stroum respektiv 2003/55 iw-ert de Gas goufe schonns de 26. Juni 2003 vum Conseil ugeholl a sollen déi éischt Direktiven iwwert de Marché intérieur vum Gas respektiv vum Stroum ersetzen.

Vläicht nach just ee Saz zu den Direktiven am Allgemengen, well besonnesch eise Wirtschaftsminister jo ëmmer nees eis Par-lamentarier drun erënnert, méiglechst eng Eent-zu-eent-Ëmsetzung duerchzeféieren. Ech si jiddferfalls frou, dass och de Minister sech dëser „rien que la directive“-Philoso-phie huet misse beugen. Dës zwee Geset-zer si grad Paradebeispiller, wéi eng Direkti-ven net eent zu eent ëmgusat konnte ginn, an dëst besonnesch am Stroumgesetz, well ganz lännerspezifesch Artikelen hei an dat Gesetz hu misse bäigefügt ginn. Et ass - heiansdo an de Kulissen - deels Rieds gaange vun enger sougenannter Lex Cege-del.

Wien huet dann elo bei dëser Ëmsetzung schlussendlech geschlof?

Éischtens muss een hei ganz kloer déi vi-regt CSV-DP-Regierung uprangeren, déi den Dossier einfach verschleeft an net déi néideg Preparative gemaach huet. Esou huet de viregte Wirtschaftsminister et ver-passt,...

» **M. le Président.** - Här Kox, loosst Der eng Fro vum Här Grethen zou?

» **M. Henri Grethen (DP).** - Här Presi-dent, ech wollt den Här Kox froen, wat en zu där Ausso do verleet hätt? Ob hien Interna aus dem Wirtschaftsministère hätt?

» **M. le Président.** - Här Kox, Dir hutt d'Wuert.

» **M. Henri Kox (DÉI GRÉNG).** - Ma ech stelle just fest, dass mer haut - de wéivillten hu mer? - den 11. Juli 2007 hunn a mer eng Direktiv hätte missen ëmsetzen an de Leit Planungssécherheet a Kloerheet sollte schafe fir den 1. Juli 2007. An dass déi Aar-bechten a sech hätte preparativ virdrun ugesat ginn, an dat ass, mengen ech, ver-passt ginn. An dofir maachen ech just eng Feststellung, dass am Virfeld vun der neier Regierung déi eng oder déi aner Preparati-ven hätte kënnen gemaach ginn.

» **Une voix.** - Très bien!

» **M. le Président.** - Den Här Grethen huet d'Wuert.

» **M. Henri Grethen (DP).** - Här Presi-dent, géif den Här Kox mir zoutrauen, wann ech d'Chance gehat hätt, nom 13. Juni 2004 Energieminister ze bleiwen, ob ech dann en temps utile dee Projet hätt kënnen dépo-séieren?

» **M. Henri Kox (DÉI GRÉNG).** - Leider sinn dat net ech, deen dat décidéiert, mä dat ass d'Vollek dobaussen, dat dat sou-verän nach ëmmer ausübt.

» **Une voix.** - Mat Ärer Hëllef awer!

(Hilarité)

» **M. le Président.** - Den Här Wirt-schaftsminister huet d'Wuert.

» **M. Jeannot Krecké, Ministre de l'Économie et du Commerce extérieur.** - Här President, et ass net meng Gewunnecht - a mäi Virgänger weess dat -, fir an d'Vergaan-genheet ze goen, mä wann d'Madame Brasseur am Numm vun der DP hei seet, dass et dës Regierung ass, déi den Dossier verschleeft huet, da gött et een Datum, dee sonnekloer ass: Si hätt missen ëmgusat sinn den 1.7.2004, a manifestement...

» **M. Henri Kox (DÉI GRÉNG).** - Jo, jo, entschëllegt! Bien sûre! Merci.

» **M. Jeannot Krecké, Ministre de l'Économie et du Commerce extérieur.** - Ma-nifestement war ech zu deem Zäitpunkt net Minister!

» **M. Henri Kox (DÉI GRÉNG).** - Okay, Merci, Här jëtzege Wirtschaftsminister, fir d'Kloerstellung fir de fréiere Wirtschafts-mi-nister.

(Hilarité)

D'Acteuren, an hei besonnesch d'Gemen-gen, hätte misse vill éischter a proaktiv op dës Ouvertür virbereet ginn, a sech déi fën-nef Joer virdrun. Ech hoffen, dass et a sech dann eben en Oubli war a kee bewosst En-nerloosse vun Hëllefstellung.

Och de jëtzege Wirtschaftsminister huet laang gebraucht an dësem Dossier, fir vi-runzekommen. Et gött sécherlech eng ganz Rei vun Ursaache fir dat Netukommen am Ufank. Sécherlech huet d'Présidence am Ufank vun der Legislaturperiod Hiert dozou bäigedroen. Dësen Ëmstand ass awer nëmme bedingt als Ursaach unzeeerkennen, och deen Datum vun der Présidence war scho laang bekannt.

Eppes schéngt awer fir déi Gréng ganz kloer ze sinn: Déi jëtzege Regierung war we-der op den Dossier Energie, an domat och de Klimaschutz, virbereet nach huet si déi néideg Visioun fir e Paradigmewiessel an der Energiepolitik während deene leschten dräi Joer développéiere kënnen. Heizou ee Beispill.

Den Ëmgang mat den erneierbaren Energië war an ass nach ëmmer e Paradebeispill fir dës Onkohärenz. Sécherlech sinn e Méin-deg nei a besser Reglementer fir d'Förde-rung vun den erneierbaren Energië respek-tiv der Energie-Effizienzsteigerung presen-téiert ginn, déi - ech hoffen emol - dem Sec-teur erëm déi néideg Planungssécherheet zrëckginn. Am gläichen Otemzuch gött awer alles Erdenkleches ugestallt, fir d'er-neierbar Energien an och d'Effizienzsteige-rung erëm ze relativéieren an hire Bäitrag ze marginaliséieren.

Esou ass souwuel aus dem Mond vum Pre-mierminister wéi ëmmer nees aus dem Mond vum Wirtschaftsminister ze héieren, et si jo ëmmer nëmmen 8% bis 2020 méig-lech.

Falsch, nach eng Kéier falsch a fir d'Drëtt falsch! Dëse Prozentsaz baséiert zwar op enger Potenzialstudië, déi vun engem re-nomméierten Institut, dem Fraunhofer Insti-tut, ausgeschafft gouf, déi Potenzialstudië huet awer eng Onmass vu Parametere, déi, jee nodeem wéi déi verstatt a gedréint ginn, e méi oder manner héijen Undeel vun erneierbaren Energien opweisen. Beson-nesch den Energieverbrauch an hei speziell de Stroumverbrauch gi kaum thematiséiert respektiv fanne Berücksichtigung an där Etüd.

Esou geet dës Etüd nach ëmmer vun enger Steigerung vun 20% bis 2020 am Stroum-beräich aus. Hu mir net och do zu Bréissel versprach, bis 2020 europawäit 20% ze re-duzéieren? Dobäi ass d'Relatioun tëschent Energiekonsum an erneierbar Energië ganz evident. Jee méi mir den héijen Energiekon-sum an de Grëff kréien, desto méi héich gött den Undeel natierlech vun den erneierba-ren Energien.

Beim inlännesche Kraaftstoffverbrauch, also beim Bensin an dem Diesel, dergéint gi mer eis ganz vill an héich ambitiéis Ziler. Hei geet d'Potenzialstudië nämlech vun enger Reduktioun vu 17% bis 2020 aus. Beim Stroumverbrauch wäert sech deemno de Wirtschaftsminister duerchgesat hunn a beim Kraaftstoffverbrauch den Ëmweltmi-nister.

Och d'Zesummespill an d'Koordinatioun të-schent dem Ëmwelt- an dem Wirtschafts-mi-nister - oder de -ministèren - loossen nach ëmmer ze wënschen iwwreg. Kaum huet deen ee seng Programmer um Dësch, gi se direkt erëm vun deem aneren ofgewiergt an als wirtschaftsfeindlech, als utopesch oder als ze deier ofgestempelt. Dobäi ass be-kannt, an dat huet de Stern-Report ganz an-drocksvoll bewisen, dass den Invest a kli-maschounend Technologien haut ëm e Vill-faches méi bëlleg ass, wéi wa mer nach Jo-ren drop waarden.

Dass et am Wirtschaftsministère och esou laang gedauert huet, bis endlech alles um Rulle war, huet och mat der Zesummeset-zung vun dësem Ministère ze dinn. Hei be-steet en „fliegende Wechsel“ vun den zoustännige Beamten aus dem Wirt-schaftsministère an d'Energiewirtschaft. Ko-

mesch ass jiddfealls, dass dee Wiessel oft no Reforme vun engem Energiegesetz erfollegt. Déi finanziell Ureizer respektiv d'Attraktivitéit vum Job an der Energiewirtschaft sinn natierlech méi grouss, wéi am Ministère dréche Gesetzter redigéieren ze mussen. Op dës Problematik kommen ech awer nach eng Kéier méi spéit zrëck. Mä zrëck zu den Aarbechten innerhalv vun der Kommissioun!

Esou wéi schonns gesot, hate mer eng ganz Rei vu Sätzungen an hu ganz konstruktiv, trotz den inhaltlechen Divergenzen, quer iwwert d'Parteien ewech un der Ëmsetzung vun dësen Direktive geschafft. Vlächent souzen awer déi zwou gréissten Oppositionsparteie während 19 Sätzungen och nëmmen do Kaarten ze spillen? Ech war jiddfealls erstaunt iwwert de Communiqué, deen déi Sozialistesche Aarbechterpartei e Méindeg erausginn huet, fir der Opposition keng konstruktiv Aarbecht innerhalv der Kommissioun ze ënnerstellen.

Fakt ass, dass ech am Numm vun der gréngeger Fraktioun - a virdrun huet dat op androcksvoll Aart a Weis d'Madame Brasseur och fir d'DP gesot - 19 schrëftlech Amendementer eragereecht hunn.

» Une voix.- Aha!

» **M. Henri Kox (DÉI GRÉNG).**- Niewent dës schrëftlechen Amendementer hunn ech lech och den 20. März e Bréif zoukomme gelooss, fir endlech och emol dem Wirtschaftsminister seng Proposen ze héieren, wat alles am Beräich vun der Netzsummeleung an der allgemenger Energiepolitik geplangt ass. Sait dem Débat d'orientation iwwert d'Energiepolitik vum leschten Dezember gëtt just nach alles an der donkelster Donkelkammer vum Wirtschaftsminister geplangt an decidéiert.

Nodeems déi Gréng zesumme mat der DP e Méindeg eng Gesetzespropos ugekënnegt hunn, fir de Gemengen endlech eng Rechtsbasis bei hiren Tätigkeiten am Beräich vun der Energie an dem Klimaschutz ze ginn, ze behapten, d'Oppositionsparteie géife sech net konstruktiv abréngen, ass schonn e staarkt Stéck a weist éischter op e schlecht Gewëssen hin, dat si bei dësen zwee Gesetzesprojeten hunn.

Eemol méi weist hei besonnesch d'Sozialistesche Aarbechterpartei, an hei wëllt ech den Ëmweltminister ausdrëcklech ausklammern, dass si den Eescht vun der Situatioun am Beräich vum Klimawandel net richteg matkritt hunn. Souguer déi Chrëschtlech-Sozial Vollekspartei schéngt dat mëttlerweil matkritt ze hunn. Sou war den 20. Abrëll grouss an der Dagespress nozeliesen: „CSV verlangt Kurswechsel beim Klimaschutz.“ A weider war nach ze liese vum Generalsekretär Schank: „Sämtliche Fakten liegen auf dem Tisch. Nun muss gehandelt werden!“ Saitdem ass et zwar erëm zimlech roueg ginn an et herrscht praktesch Funkstille, mä zumindest hu si den Anstand a klappen net gläich an d'Filleken, wann emol konstruktiv Propositione vun der Opposition kommen.

Wann dës Gesetzespropos vun DÉI GRÉNG an DP hätt missen an enger Kommissioun diskutéiert ginn, dann éischter an der Intérieurskommissioun, wéi an der Wirtschaftskommissioun. Dä gréngeger Fraktioun war et nach ëmmer wichteg, de Gemengen net nëmmen de Kader ze liwweren, fir op engem liberaliséierte Stroum- a Gasmarché kënnen ze bestoen, mä méi generell Aufgaben am Beräich vun der Energiepolitik a besonnesch am Beräich vum Klimaschutz ze iwwerhuelen.

Ech wëll hei nach eng Kéier un eng Motioun vun der gréngeger Fraktioun erënneren, déi während dem Débat d'orientation iwwert d'Energiepolitik am Dezember an déi zoustänneg Kommissioun verwise gouf. Heibäi gëtt d'Regierung invitéiert, ech zitieren: «à soutenir les communes pour qu'elles puissent participer pleinement aux efforts communs pour relever un des principaux défis du vingtième siècle, c'est-à-dire la protection du climat et la réduction des émissions de gaz à effet de serre».

Sait Jore gëtt näischt ausgeloooss, fir grad d'Gemengen an deem Beräich regelrecht ze schikanéieren. Ech wëll och de fréieren Innenminister, den Här Wolter, nach eng

Kéier zitieren, deen op eng Question parlementaire vum Kolleg Bausch de 26.7.2002 geäntwert huet - ech soen et elo e bëssen op Lëtzebuergeresch -, dee ganze Buttek dach nëmmen ze verkafen. Ech zitieren aus där Question parlementaire, déi am Zesummenhang mat der Liberaliséierung vun de Stroumnetzer steet: «La meilleure solution possible pour les communes, afin de sauver leur patrimoine, serait une vente au meilleur offrant de l'ensemble des infrastructures, à savoir les réseaux de distribution de l'énergie et les équipements annexes ainsi que la clientèle actuelle encore attachée au réseau.»

Et sinn awer grad d'Gemengen, déi no beim Bierger eng ganz wäertvoll Aarbecht kënnen leeschten. Beispiller gëtt et genuch, ech wëll just hei un déi sëllege Klimabündnisgemengen erënneren. Och an der Berodung waren et Gemengen, déi Virreider gespillt hunn. Dir braucht lech just nëmmen d'Beispill vum Kanton Réiden unzucken.

Mä vlächent hëlleft och den Drock vun der LSAP - elo endlech! - op den aktuellen Innenminister, fir an dës Gesetzespropos vun DP an DÉI GRÉNG vum Méinden endlech Bewegung eranzekriegen.

Här President, Dir Dammen an Dir Hären, zrëck zum eigentlechen Dossier vun der Liberaliséierung am Stroum- an am Gasmarché. Ier ech mech mat der Ëmsetzung vun der Direktiv a Lëtzebuerger Gesetzgebung wëll beschäftegen, ass et vlächent nach eng Kéier opschlösseräich, déi wichteg Froe vun der Liberaliséierung ze belichten.

1. Wat seet déi Direktiv? Wat soll duerch d'Liberaliséierung erreecht ginn?

- D'Ouvertür op all kommerziell an duerno (Stéchdatum 1. Juli 2007) op all Haushalter.

- E bessere Kader, fir dass déi Liberaliséierung a geregelte Bunne soll oflafen. Eng Reguléierung vun der éischter Direktiv.

- D'Europaparlament huet ënnert der Fierderféierung vum Claude Turmes nach folgend Punkte konnten duerchsetzen:

- eng legal Trennung tëschent Netz a Produktioun, géint de Widerstand vun den Energiekonzerner,

- d'Äféierung vun nationale Reguléierungsämter,

- en detailléierten Artikel 3 mat der Obligation de service public, besonnesch mam Schutz fir Konsumente souwéi der Stroumkennzeechnung,

- Konkurrenz haaptsächlech op der Grousshandelsebene anzeféieren,

- de Choix fir de Konsument net nëmme beim Präis, mä och bei der Qualitéit, notament duerch d'Äféierung vu Kennzeechnungen an d'Méiglechkeet, grénge Stroum anzekafen.

2. Wéi eng Erfahrunge sinn da mëttlerweil an Europa mat der Liberaliséierung gemaach ginn?

- An deene Länner, wou et genuch Wettbewerb gëtt - an där gëtt et - an an deene streng genuch géint d'Konzentratioun vum Marché virgaange ginn ass, sinn d'Resultater net esou schlecht, insbesondere a Skandinavien.

- Méi schwierig ass d'Lag an Däitschland an a Frankräich, well duerch ongebremste Fusione sech besonnesch déi dräi Kompanien an der EU breetgemaach hunn, an déi heeschen RWE, E.on an EDF.

3. Aus deenen Erfahrunge vun de leschte Jore mussen deemno nei Konsequenze gezu ginn. An dat sinn?

- Wann den Uelech- an de Gaspräis steigt - an do hu mir hei keen Afloss drop, déi wäerten an der Zukunft och weider steigen; et ass eng Illusioun ze mengen, de Stroumpäis an de Gaspräis géifen an der Zukunft falen -, musse mir aner Méiglechkeeten notzen, fir d'Käschten ze reduzéieren. Dëst geet just nëmmen iwwert d'Stroumspuren.

- Kucken, dass een als Land - an do ass Lëtzebuerg och betraff - net duerch grouss Konzern vu bausse geschléckt gëtt.

- Komplett Trennung vun den Netzer an ënnert öffentlecher Kontroll.

- Genuch eenheemesch Acteuren, an do besonnesch eis Gemenge weider un deem Marché bedeelege loossen.

- Schutzmoosname géint den Abus, besonnesch fir déi sozial Schwaach, anzeféieren.

- Stärkung vun Transparenz a Matsproocherecht vun all den Acteuren.

- E Begleettgremium, deen direkt mam Regulateur ka schwätzen.

D'Liberaliséierung vu Stroum- a Gasmarché ass deemno weder schwaarz nach wäiss, mä eng Chance, den Energiesektor esou

opzestellen, fir dass mir där gréisster Erausforderung vun der Mënschheet, nämlech dem Klimawandel, kënnen konsequent entgéintwirken.

Liberaliséierung heescht och net Privatiséierung.

Liberaliséierung heescht net den Ausverkauf vum Intérêt public, mä grad d'Stärkung vum öffentleche Sektour.

Liberaliséierung heescht net Konzentratioun, mä Dezentraliséierung. Net een Acteur, mä d'Villfalt vun den Acteuren stäerken.

Liberaliséierung heescht, den Internet vun der Energie virbereeden, fir dass jidder Energiekonsument zum Energieproduzent ka ginn.

Liberaliséierung heescht, de Klima- an de Verbraucherschutz an de Vierdergrond ze stellen.

Déi gréng Fraktioun ass alles anescht wéi iwwerzeegt, dass dës Gesetzter zur Strouma Gasliberaliséierung deene virgenannte Prinzipie kënnen gerecht ginn. Dës Gesetzter weisen op ville Punkten Defiziter op, déi mir net kënnen matdroen. Dës Defiziter si souwuel bei sozialen, ökologeschen, transparenten an och demokratesche Beräicher an dësem Gesetz zrëckzefannen.

Här President, Dir Dammen an Dir Hären, no deene méi generellen Iwwerleeungen zu dësem Gesetz, wëll ech eng Rei vun eenzelne Punkten aus dësem Gesetz, an aus gréngeger Siicht nach eng Kéier, méi genee belichten; an dëst besonnesch no de virgenannte véier Kritären.

Als éischte Punkt wëll ech heibäi de soziale Vëlo, eh Volet belichten.

Pardon!

» **Une voix.**- Dat ass och emol gutt gesot.

» **M. Henri Kox (DÉI GRÉNG).**- Dat ass och emol gutt gesot.

(Interruptions diverses)

» **M. le Président.**- Här Kox, huet de Fuedem nees op, wann ech gelift!

» **M. Henri Kox (DÉI GRÉNG).**- Merci, Här President.

Dass dëst Gesetz iwwert de Knéi gebrach gouf, ass besonnesch um Punkt vun der sozialer Ofsecherung vu Leit auszemaachen, déi net méi déi néideg Moyenen opbréngen kënnen, fir hir Energie, sief dat Stroum oder Gas, ze bezuelen. Et ass och grad do, wou de Rapporteur virdrun des Laangen an des Bredenen nach referéiert huet. Dës Volet gëtt souwuel am Stroumgesetz wéi am Gasgesetz an am Kapitel iwwert de Prinzip vum Service universel behandelt.

Dës Service universel am Stroumgesetz beseet zum Beispill, dass all Stroumverbraucher d'Recht op den Zougang vu Stroum huet an dës Stroum zu enger definiierter Qualitéit, vergläichbar, transparent an zu engem abordabele Präis ze kriegen ass.

Niewent dës Kritäre gëtt awer och an deemselwechten Artikel d'Prozedur definiert, wéi et zu engem Ofspäre vun der Energie kënn, wann e Client säi Stroum oder Gas net méi ka bezuelen.

Esou gesäit d'Prozedur vir, dass et no enger schrëftlecher Opfuorderung am Intervall vun zweemol 15 Deeg zu enger Ofspärung kënn an op d'Käschte vum Client e Compteur à prépaiement ugeschloss gëtt.

Net nëmmen, dass dëst zousätzlech Käschte fir de Client bedeit, mä d'Gefor ass grouss, dass et zu onnéidege prekäre Situatiounen kënn. Situatiounen, déi sech och ëmmer méi oft hei zu Lëtzebuerg erginn.

Bis haut konnt mir nach keen offiziell eng Zuel iwwert den Ëmfang vun dësen Ofspärungen genau quantifizéieren. Och konnt mir bis haut nach kee genau d'Opschlüsselung vun dëse Fäll presentéieren. Dobäi hunn ech am Ufank vun eisen Diskussiounen an Aarbechten an der Kommissioun drop higewisen, eis genau Zuelen iwwert den Ëmfang vun dësen Ofspärungen ze liwweren - nozeliesen am Rapport vum 15. Februar.

Wéi gesot, bis haut hu mir déi Donnéeën nach ëmmer net ze gesi kritt. Et geet hei net dorëms, déijéineg ze schützen, déi en Abus bedreiwen, mä grad deenen, déi an enger prekärer Situatioun sinn, eng geziilten Hëllefstellung unzebidden.

D'Regelung, déi de Moment am Gesetz ageschriwwen ass, geet fir déi gréng Fraktioun net duer. De Statsrot huet a sengem Avis majoritär suggéiert, d'Sozialamt anzuschalten an am Virfeld ze informéieren, esou dass iwwert dee Wee déi néideg Hëllefstellung kënnen gelescht ginn.

Dës Propos geet eis awer net wäit genuch a bitt dofir och net déi néideg gläichberechtigt Sécherheet am ganze Land un, well et staark vun deenen eenzelne Sozialämter ofhänkt a vlächent just an deene grouss Stied richteg funktionéiere wäert. Derbäi kënn, dass déi Aufgab erëm op d'Gemengen ofgewälzt gëtt. Och gëtt d'Sozialamt bei jidder Op- an Ofspärung informéiert, ob et sech dobäi ëm e Sozialfall handelt, oder net.

Duerfir schléit déi gréng Fraktioun nach ëmmer vir, den Avis séparé vum Statsrot ze ënnerstëtzen, deen dës Aufgab net de Sozialämter iwwergëtt, mä dem Fonds national de Solidarité. Den Avis séparé schléit nämlech eng ähnlech Prozedur vir, wéi déi, déi de Moment a Frankräich applizéiert gëtt, an dofir wonnert et mech, dass d'Regierung opgefuerdert gëtt vum Rapporteur, sech a Frankräich ëmzekucken.

Hei ass et d'Persoun selwer, déi sech beim Fonds national de Solidarité umellt, fir déi néideg Hëllefstellung ze kriegen.

(Interruption)

Dir hutt och virdru gesot, a Frankräich an an der Belsch sollte mer kucken, wéi eng Regeln do bestinn, a mir haten an der Diskussioun an der Kommissioun des Öfteren och iwwert den Avis séparé Rieds, deen ebe genau déi Formulatiounen aus dem franséische Gesetz iwwerhëlt. Heiduerch wäerten och onnéideg Ofspärungen erfollegen, well et genau op déi Leit ausgerichtet ass, déi sech an enger prekärer Situatioun befinnen.

Duerfir erlaabt mer, Här President, den Avis séparé vum Statsrot als Amendement nach eng Kéier ze déposéieren an lech ze bieden, dës Amendementer zur Ofstëmmung ze stellen.

Amendement 1: Protection des personnes les plus démunies

À l'article 2 du projet de loi, le paragraphe 8 est remplacé par le texte suivant:

«(8) Pour les clients résidentiels, en défaillance de paiement, les règles suivantes sont applicables en matière de fourniture d'électricité:

a) En cas de non-paiement dans un délai d'un mois à partir de la date d'échéance d'une facture, un rappel est envoyé au client par le fournisseur avec la proposition d'un règlement amiable et avec la mention qu'en cas de difficulté de paiement, la personne est en droit de demander une aide auprès du Fonds national de Solidarité.

b) Toute personne physique titulaire d'un contrat de fourniture d'électricité éprouvant des difficultés à s'acquitter de la facture d'électricité de sa résidence principale en raison d'une situation de précarité, et qui n'aura pas pu trouver d'accord avec son distributeur sur un règlement amiable, peut déposer auprès du Fonds national de Solidarité une demande d'aide au paiement des factures d'électricité, le cas échéant et si elle le souhaite, par l'intermédiaire d'un service social.

Le Fonds national de Solidarité informe immédiatement le fournisseur de l'introduction d'une demande d'aide. Toute personne ayant déposé un dossier de demande d'aide bénéficie, dans l'attente de la décision du Fonds national de Solidarité, du maintien de la fourniture d'électricité avec une puissance minimale à déterminer par règlement grand-ducal.

Les critères de décision d'attribution par le Fonds national de Solidarité sont les suivants:

- le quotient social du foyer, tenant compte des ressources du foyer et des personnes composant le foyer (le calcul technique de ce quotient sera précisé par voie de règlement grand-ducal);

- la part de la facture d'électricité dans les ressources du foyer;

- les charges du foyer;

- la situation familiale du demandeur;

- la situation de santé des personnes vivant au foyer;

- l'existence d'un éventuel handicap;

- les caractéristiques du logement et de son équipement électrique;

- la présence au foyer d'enfants ou de personnes âgées;

- l'existence d'un éventuel surendettement.

L'aide attribuée consiste en une prise en charge totale ou partielle du paiement au distributeur des factures impayées. Cette prise en charge peut être effectuée sous forme de subvention, d'avance remboursable ou des deux, selon la situation du demandeur.

Le Fonds national de Solidarité, en collaboration avec les distributeurs d'électricité, propose les mesures et informations visant à réduire les factures à venir ou à en faciliter le paiement, telles que conseil en matière de maîtrise de la demande d'électricité, conseil tarifaire, bilan de l'installation électrique, recherche du financement en vue de la rénovation de l'installation électrique, mise en place de comptages appropriés. Le Fonds national de Solidarité peut également informer ces personnes sur les organismes susceptibles d'apporter une aide à la gestion budgétaire. Les distributeurs fournissent au Fonds national de Solidarité les seules informations nécessaires au traitement des demandes d'aide et à la proposition des mesures de prévention.

c) En cas de non-paiement dans un délai d'un mois à partir de la date d'envoi du rappel visé sous a) et pour le cas où le client n'introduit pas de demande d'aide auprès du Fonds national de Solidarité, le fournisseur a le droit de faire placer, par le biais du gestionnaire de réseau concerné, un compteur à prépaiement jusqu'au règlement entier de la dette. En cas de paiement intégral de la dette par le client, le fournisseur charge le gestionnaire de réseau concerné de remplacer le compteur à prépaiement par un compteur normal. Ce remplacement s'effectue dans les trois jours ouvrables qui suivent la demande.

Le placement d'un compteur à prépaiement ne suspend pas le recouvrement des factures antérieures, le fournisseur se réservant le droit d'en obtenir le paiement par toutes voies de droit. L'octroi d'un plan de paiement des arriérés ne modifie pas les conditions d'exigibilité des factures émises ultérieurement par le fournisseur.

Tous les frais engendrés par les procédures de recouvrement, le placement et l'enlèvement d'un compteur à prépaiement, les frais de déconnexion et de reconnexion sont à charge du client en défaillance de paiement.»

Amendement 2: Protection des personnes les plus démunies

À l'article 7, les paragraphes 6 et 7 sont à adapter en conséquence:

«(5) Afin d'assurer le financement du mécanisme de compensation visé au paragraphe 4, tout gestionnaire de réseau, distribuant de l'énergie électrique à des clients finals sis au Grand-Duché de Luxembourg, doit récupérer la contribution due pour le mécanisme de compensation exigible dans le chef du client final par toutes voies de droit, soit directement auprès du client final, soit auprès du fournisseur devant collecter la contribution. Le gestionnaire de réseau a le droit de recourir aux procédures prévues au paragraphe 8 de l'article 2 pour les clients résidentiels et à l'article 1134-2 du Code civil pour tous les autres clients, quel que soit le montant de la contribution non réglée ou devant être transférée.

En cas de fourniture intégrée, le fournisseur, qui a avec le client final un contrat incluant le paiement de cette contribution à être transférée par le fournisseur au gestionnaire de réseau, a les mêmes droits que le gestionnaire de réseau pour récupérer la contribution, y compris ceux découlant du paragraphe 8 de l'article 2 pour les clients résidentiels et de l'article 1134-2 du Code civil pour tous les autres clients, quel que soit le montant de la contribution non réglée.

(6) Les obligations découlant de l'article 6 de la loi modifiée du 5 août 1993 concernant l'utilisation rationnelle de l'énergie et de ses règlements d'exécution sont à considérer comme obligations de service public bénéficiant de la compensation financière au sens du paragraphe 3 du présent article.»

Amendement 3: Protection des personnes les plus démunies

L'article 21, paragraphe 2, est également à adapter:

«(2) Tout gestionnaire de réseau ou fournisseur visé au paragraphe 1^{er} récupère les frais d'utilisation du réseau exigibles dans le chef du client final par toutes voies de droit, soit directement auprès du client final, soit auprès du fournisseur devant collecter les frais d'utilisation du réseau pour les transférer au gestionnaire de réseau. Tout gestionnaire de réseau ou fournisseur visé au paragraphe 1^{er} a également le droit de recourir aux procédures prévues au paragraphe 8 de l'article 2 pour les clients résidentiels et à l'article 1134-2 du Code civil pour tous les autres clients, quel que soit le montant des frais d'utilisation non réglés ou devant être transférés.»

Commentaire:

Ces trois amendements reprennent intégralement les propositions de texte du Conseil d'État dans son avis séparé du 24 avril

2007, tout en ayant adapté la numérotation et les renvois d'articles à la version actuelle du projet de loi. Les amendements se basent prioritairement sur les considérations suivantes:

Le Conseil d'État signale que les auteurs de la directive européenne à l'origine du présent projet de loi sur l'organisation du marché de l'électricité furent conscients de la nécessité d'une protection spécifique des clients vulnérables, car le paragraphe (24) du préambule de la directive mentionne que «...Il convient que les États membres prennent les mesures nécessaires pour protéger les consommateurs vulnérables dans le contexte du marché intérieur de l'électricité.» Le Conseil d'État estime par contre que les auteurs du projet de loi luxembourgeois n'ont pas suffisamment tenu compte de ces obligations, car les dispositions du paragraphe 8 de l'article 3, traitant des clients résidentiels en défaillance de paiement, risquent de laisser trop de ménages visés dans le noir!

La Chambre des Employés privés, quant à elle, se déclare consciente de la nécessité d'instaurer une procédure de déconnexion pour éviter des abus, mais qu'il convient, dans le même temps, de protéger les moins aisés qui sont incontestablement confrontés à des problèmes financiers ne leur permettant pas de payer leurs factures dans les délais impartis. La CEP-L signale en outre l'importance d'agir aussi de façon préventive. L'information et la sensibilisation à l'utilisation rationnelle de l'énergie devraient être promues et adressées notamment aux personnes qui risquent d'avoir ou qui ont déjà connu des retards de paiement de leur facture d'électricité ou de gaz.

La Chambre de Travail considère que les services d'intérêt général sont des éléments essentiels pour la cohésion sociale et la solidarité et constituent un pilier important du modèle social luxembourgeois. «Une importance particulière revient au traitement des clients qui sont en défaillance de paiement en raison de difficultés financières. Il est vrai que le paragraphe (8) de l'article 3 fixe des règles en cas de défaillance de paiement. Notre chambre estime cependant que ces règles sont trop draconiennes et ne confèrent pas un droit à une livraison minimale d'électricité à des clients nécessiteux. (...) Notre chambre demande que le projet de loi prévoit une procédure plus précise conférant un droit au client de faire analyser rapidement sa situation financière par une instance publique qui doit décider que le client est pris en charge s'il ne peut pas payer ses factures d'électricité (...).»

Amendement 4: Évaluation relative aux mauvais payeurs, aux déconnexions et aux compteurs à prépaiement

L'article 54, paragraphe 3, du projet de loi est modifié comme suit:

«(3) Le régulateur établit un rapport sur les résultats de ses activités de surveillance et de contrôle qu'il transmet au ministre. Ce rapport mentionne également les mesures concrètes prises au niveau national pour garantir la présence sur le marché d'une diversité suffisante d'acteurs ou les mesures concrètes prises pour favoriser l'interconnexion et la concurrence de même qu'un chapitre spécifique traitant des informations relatives aux aides accordées, voire refusées par le Fonds national de Solidarité ainsi que du nombre de compteurs à prépaiement placés par les fournisseurs. Ce rapport est établi annuellement jusqu'en 2010 inclus et ensuite tous les deux ans. Il est transmis à la Commission européenne, au plus tard le 31 juillet.»

Commentaire:

L'amendement se réfère également à l'avis séparé du Conseil d'État. Il y propose que le rapport annuel du régulateur contienne un chapitre spécifique qui informe sur le nombre de citoyens qui peinent avec la concrétisation du droit à l'électricité pour tous. La disponibilité de ces données est une condition sine qua non pour pouvoir se faire une image fidèle de la réalité sociale dans le secteur de l'énergie et pour pouvoir - en tant que gouvernement ou parlement - évaluer périodiquement la pertinence des dispositions légales.

(s.) Henri Kox, François Bausch, Camille Gira, Jean Huss, Viviane Loschetter.

Aus ömweltpolitesche Grënn si besonnesch d'Artikele bezüglech der Obligation de raccordement respectiv den Accès aux réseaux vun neien Anlagen, an hei besonnesch vun Erneierbar-Energie-Produktionsanlagen, respectiv der Obligation, de Service public an de Mécanisme de compensation ze benennen.

Mir begrëissen dës Artikelen ausdrécklech, gi si dach den erneierbaren Energien d'Prioritéit, fir hir ömweltfrëndlech Energie an

d'Netz kënnen anzespeisen. Och d'Ouvertür, déi am Gasgesetz gemaach gouf, begrëisse mir ausdrécklech. Mat dëser Ouvertür ass et nämlech méiglech, grouss Biogasanlagen iwwert de Wee vun der Gasaspeisung méi wirtschaftlech bedreiwen ze kënnen.

Wa mer mam Prinzip kee Problem hunn, esou hu mer awer bei der Ëmsetzung vun dëser Regelung méi Problemer. Esou plädéiere mir och d'Frais de raccordement respectiv d'Frais am Zesummenhang mat den Etüden iwwert de Wee vun den Netzkäschten ze sozialiséieren. Dëst entsprécht och éischter dem Prinzip vum Pollueur-payeur a bedeelegt indirekt domat sämtlech Energieverbraucher um Opbau vun enger nohalteger Energieversuergung.

Duerfir si mer a bleiwe mer der Iwwerzeegung, dass de Prinzip vum Mécanisme de compensation de richtige Wee ass. E Prinzip, deem d'Käschte vun der Ënnerstëtzung fir erneierbar Energië respectiv effizient Energieproduktionsanlage wéi d'Cogénérationsen op sämtlech Energieverbraucher jee no Verbrauch opdeelt.

Hei gouf et jo an de leschte Jore vill kontrovers Auseinandersetzungen, besonnesch am Zesummenhang mat der Fotovoltaik. Vläch awer nach eng Kéier zur Kloverstellung: Nach haut sinn d'erneierbar Energien ëmmer nëmme fir 25% vun de Käschte vum Fonds de compensation verantwortlech. Et sinn d'Cogénérationsen, déi nach ëmmer de gréissten Undeel vun dëse Käschten ausmaachen. Mir stinn awer souwuel hannernt de Käschte fir d'erneierbar Energië wéi hannernt de Käschte vun de Cogénérationsen, well mer der Iwwerzeegung sinn, nëmmen iwwert dee Wee e Paradigmawissel am Energieberäich ze erreechen. Vill vun deene Cogénérationsen ginn nämlech ënner kommunaler Verantwortung bedriwwen.

Här Minister, Dir kënnt jiddefalls op eis voll Ënnerstëtzung zielen, wann et heescht dëse Prinzip weiderhin zu Bréissel ze verdeedegen. Do, wou mer awer nach ëmmer Divergenzen hunn, ass iwwert d'Ëmverdeelung respectiv d'Héicht vum Kompensationsfong.

Dës Angscht iwwert ze héich Käschten huet nämlech staark d'Reglementer iwwert d'Förderung vun den erneierbaren Energië beaflosst. Déi nei Reglementer, déi e Méindeg an enger gemeinsamer Kommissiounssitzung vun der Ëmwelt- a Wirtschaftskommission presentéiert goufen - et war zwar nëmmen eng hallef Stonn Zäit, am Virfeld hate mer och keng Dokumentatioun zougestellt krut; Dir hutt awer eng hallef Stonn iwwert deen neien Netzzesummebroch vun der Cegedel geschwat, duerfir gouf just eng hallef Stonn iwwert d'Förderung vun den neie Reglementer geschwat -, weisen d'Fördersätz op, déi d'Wirtschaftlechkeet...

(Interruption)

Ech mengen, ech war awer do. Et kann een alles nolliesen.

» M. le Président.- Här Minister?

» M. Jeannot Krecké, Ministre de l'Économie et du Commerce extérieur.- Neen. Entschëllegt. Ech hat awer d'Impressioun, den Här Kox wier do an enger anerer Sitzung gewiescht. Ech ka mech net erënnere, dass ech eng hallef Stonn iwwert d'Cegedel geschwat hunn.

» Une voix.- Plus ou moins.

» M. Henri Kox (DÉI GRÉNG).- Oh, ech hu souguer de Wecker gekuckt. Et war fënnéir vir hallwer zwielf.

» Une voix.- Macht ee Kompromëss!

» M. Henri Kox (DÉI GRÉNG).- Déi Reglementer, déi do presentéiert goufen, weisen d'Fördersätz op, déi fir e groussen Deel vun den Anlagen d'Wirtschaftlechkeet nach ëmmer kaum erreechen. Bis elo waarde mer nach ëmmer op d'Zuelen, fir kënnen déi Wirtschaftlechkeet zesumme mam Wirtschaftsministère ze vergläichen. Besonnesch d'Fotovoltaik weist de Moment eng vill ze vill kleng Aspeisevergütung op.

De Prinzip vu moderaten Aspeisungssätz a klenger Degressioun iwwert déi nächst Joren huet nämlech zur Konsequenz, dass och an den nächsten zwee Joer séier weineng Anlagen opgeriicht wäerte ginn. Dëse Prinzip ass och contraire zu den Empfehlungen aus der Potenzialstudie, déi méi staark Degressioun wéinst dem Technologiefortschritt verlaangt.

Ech ginn lech haut schréfflech, dass de Bilan am Beräich vum Ausbau vun den erneierbaren Energie fir dës Regierung vernichtend wäert ausfalen. Dobäi hutt Der all d'Argumenter op Ärer Säit. Dir braucht lech just d'Säit 220 aus der Potenzialstudie un-

zekucken, wou en Zeenariverglach vu Käschte versus Notze vun erneierbaren Energien opgestallt gouf. Eleng dëse Verglach weist, dass d'Käschte fir den Ausbau vun den erneierbaren Energien eleng duerch déi net getätegte Ausgabe fir fossil Energieträger kompenséiert ginn.

Ech zielen d'Käschten, wéi se hei an der Potenzialstudie virgestallt goufen, emol einfach op. D'Förderkosten, esou wéi se vum Wirtschaftsminister festgeluecht gi bis 2020, weisen e Chiffer op vu 681 Milliounen Euro. „Vermiedene Ausgaben für fossile Energien gesamt“ weisen e Chiffer vu 629 Milliounen Euro op. Dat heescht, iwwert d'Längt vun der Förderung eng sougenannten Nullronn. An dobäi sinn déi wirtschaftlech Ëmweltschied nach emol guer net mat berücksichtegt. Dat wat am „Stern-Report“ am Januar presentéiert gouf, léisst sech also ganz konkret hei zu Lëtzebuerg novollzéien an och beweisen.

Duerfir, Här Minister, eleng eng lescht Bitt: Ech bieden lech am Numm vun enger nohalter an zukunftsorientéierter Energiepolitik, fir e Freideg bei den Diskussiounen am Regierungsrout iwwert déi nei Reglementer méi eng couragéiert an offensiv Politik anzuschloen!

E puer Sätz zu de Réseauen an der Propriétéit vun de Réseauen. D'Réckgrat vum liberaliséierte Marché. Et ass grad op deem Punkt, wou déi Gréng eng ganz Rei Initiativen a Virschléi gemaach hunn, fir ze kucken e séchert Netz an öffentlecher Hand opzebauen. Ech verweisen ënner anerem op de Bericht vum gréngen Europadeputéierten, dem Claude Turmes, am Optrag vum Wirtschaftsminister.

D'öffentlech Hand muss den Daum op den Netzinfrastruktur behale respectiv zrëckkréien. D'Beispill aus Däitschland respectiv den Netzzesummebroch virun zwee Joer si grad op d'Netinvestéieren um Netz zrëckzeféieren. Déi kuerzfristeg Gewënmaximéierung vu privatrechtleche Besëtzer priméiert dobäi oft op der Sécherheet um Netz.

En öffentlecht Netz ass de Garant fir d'Versuergungssécherheet souwéi d'Neutralitéit vun de kommerziellen Aktivitéite vum Gestionnaire de réseau vis-à-vis vun den ënnerschiddleche Fournisseuren, Produzenten a Clienten. Ech hoffen, dass duerch d'Initiativ vun der Gesetzespropos vun DÉI GRÉNG an DP vum leschte Méindeg an der Ënnerstëtzung vun der Sozialistescher Partei méttlerweil den Drock op den Innenminister esou grouss gëtt, dass endlech Kloverheet geschaf gëtt, fir de Gemengen déi wichteg gesetzlech Basis ze ginn.

Dem Wirtschaftsminister seng geheim an an där donkelster Donkelkammer gefouert Gesprécher respectiv Décisiounen iwwert déi zukünfteg Energiepolitik kënnen mir net guttheeschen. Sämtlech Acteure vun uewen erof ënner een Hutt ze kréien a quasi mat sämtlechen auslänneschen Acteure wéi d'RWE, d'Electrabel, d'E.on oder och nach d'EDF an engem Boot ze setzen ass contraire zum Gedanken, d'Konkurrenz um Energiemarché, besonnesch un der Ugebuetsäit, spillen ze loossen.

Wou Der jiddefalls eis voll Ënnerstëtzung hutt, ass beim Opbau vun engem staarken Netz ënner öffentlecher Kontroll. Déi historesch gewuesse Struktüre vun zwou groussen Netzgesellschaften wéi der Cegedel an der Sotel hunn dozou gefouert, dass op verschiddene Strecken haut schonns eng duebel Ausféierung besteet. Hei léisst sech deemno duerch den Zesummeschluss respectiv enger Netzgesellschaft an öffentlecher Hand villes vermeiden. Dëst ëmsou méi, dass keng Konkurrenz um Netz sollt entstoen.

Wéi ass et mat de Modalités relatives aux ouvrages électriques? «La modification et le renouvellement de tout ouvrage électrique sont réalisés aux conditions économiques les plus avantageuses.»

Do hate mer eng länger Diskussioun an der Kommissioun, well am Gesetz just «Conditions économiques» steet. D'Referenz op d'Marchés-publics-Gesetz hu mer dofir an d'Gesetz ageschriwwen fir méi Kloverheet a fir dätlech ervirzestrichen, dass net nëmmen no ekonomesche Gesichtspunkten dierf gekuckt ginn. Dat gëtt awer vum Statsrot als superfératoire ugesinn. Et weist awer, dass des Öfteren an der Praxis dëst zur Misswirkung dobause féiert.

Net nëmmen déi allgemeng Missachtung vun der Roll vun de Gemengen an deem Dossier huet zu heftege Reaktiounen innerhalv de Gemenge gefouert - dëst besonnesch beim Benotze vun de kommunale Weeër respektiv wat d'Bezuele vun de Fraisë beim Zéie vu Grief ubelaangt.

Net nëmmen, dass hei eng Opposition formelle vum Statsrot virlooch, mä och de Syvicol als Vertrieeder vun de Gemengen huet seng grouss Bedenken ervirbruecht. Besonnesch d'Entbannung vum Concessionnaire de transport oder de distribution vun enger Permission de voirie au niveau communal ass géint de Prinzip vun engem Rechtsstat.

Mir hunn duerfir och beim zweeten Avis vum Statsrot, dee seng Opposition formelle oprecht hält, kaum Bauchwéi a gesinn och net d'Gefor, dass et elo zum Stëllstand bei der Erneuerung oder dem Ausbau vu Stroumleitungen kéint kommen.

D'Instrument vum Plan sectoriel zum Beispill gétt der Regierung déi néideg Planungs-sécherheet jo och an erlaabt Korridoren ze definéieren, wou a wéi en Ausbau kann erfollegen. Wann dëse sektorielle Plang mat klore an novollzéibare Kritäre versinn ass, hu mir och kee Problem mat dem Ausbau. D'Gefor vun engem Stëllstand ass also net ze erwaarden, och wann d'Gemengen elo d'Recht kréien - esou wéi dat bei de GSM-Antennen de Fall ass - explizit Zonen an hirem PAG ze definéieren a fräi vun esou Leitungen ze sinn.

E weidere ganz kontrovers diskutéierte Punkt war d'Verleëe vu Mëttel- an Nidder-spannungsnetzer an de Buedem respektiv d'Käschte vun dësen Aarbechten. D'Kommissioun huet de Prinzip akteiert, d'Verleëe an de Buedem ëmmer ze verlaangen, et sief awer, dass et technesch net méiglech ass oder de Präis a sech ze héich ass. Déi nei Regelung geet deemno méi wäit wéi dat aalt Gesetz an hält fest, dass ëmmer muss an de Buedem verluecht ginn.

Wat d'Käschte vun dëser Mise en souterrain ugeet, esou bestoung d'Regelung, dass d'Gemengen iwwer 80% vun de Gruelkäschten hu missen iwwerhuelen. Dës Regelung gouf säit laangem vu ville Gemengen a Fro gestallt an och vun eiser Fraktioun. D'Regelung vum jëtzege Gesetz vun enger 50-prozenteger Partizipatioun kënnen déi Gréng duerfir och net deelen.

D'Verleëe an de Buedem huet eng ganz Rei vu Virdeeler vis-à-vis vun enger Iwwerlandverleeung. Niewent enger méi optescher Verbesserung huet d'Verleëe vun de Leitungen an de Buedem awer och aus sécherheetstechnesche Grënn eng ganz Rei vu Virdeeler, besonnesch bei Stierm.

D'Fraisë vun esou enger Technik mussen aus Siicht vun deene Grénge ganz kloer op d'Netzkäschten ëmgeluecht ginn. Iwwregens ass dat och esou gehandhaabt bei all den Telefonsleitungen. Et kann net sinn, dass d'Gemengen haut ugehale ginn, am Waasserberäich eng Käschtendeckung unzestriewen, mat all de Konsequenze fir den Endverbrauch, dëst awer am Stroumverbrauch net soll de Fall sinn. Och an deem Beräich mussen sämtlech Käschten, déi entstinn, sozialiséiert ginn an net iwwer eng Quersubventionéierung kënschtlech no ënne gehale ginn.

Wann d'Fraisë fir e Konsument doduerch méi héich sollte ginn an déi sozial méi Schwaach Problemer sollte kréie fir ze bezuelen, mussen déi Leit duerch eng gezielte Sozialmesure respektiv -instrumenter geholfen kréien.

Sozialpolitik kann an dierf och net mat Hëllef vun der Energiepolitik geléist ginn, ëmsou méi dëst Gesetz dem Concessionnaire d'Recht zougesteet, d'Domains public et privé de l'État et des communes gratis ze benotzen. Eleng dëst Recht geet ganz wäit iwwert d'Fraisen eraus, déi bei de Gruelkäschten entstinn.

E weidere Punkt, dee vum Statsrot och a sengem zweeten Avis mat enger Opposition formelle versi war, ass d'Cession d'ouvrages électriques. Esou huet de Regierungstext virgesinn, dass e Propriétaire vun engem Réseau nëmmen de Réseau un en Drëten kann ofginn, deen déi gréissten Extensioun nationale opweist - eng sougenannte Lex-Cegedel-Net-Moosnam. D'Op-

position formelle gouf awer och a sengem zweeten Avis vum Statsrot oprechterhalen. Sollte mer et fäerdeg bréngen, an dorunner probéieren déi Gréng matzeschaffen, dass d'Netzer an d'öffentlech Hand sollten iwwergoen, stäipe mer d'Regierung an enger neier parlamentarescher Initiativ an deem Beräich, fir dës Oppositioun formelle kënnen ze hannergoen.

Här President, Dir Dammen an Härën, zum Schluss nach eng Kéier méi allgemeng Remarquen zu der Transparenz, der Kontroll an der Partizipatioun vun der Zivilgesellschaft. Besonnesch d'Transparenz iwwert den Étiquetage, also deen iwwert d'Zesummesetzung vum Stroummix läit eis do um Härz. Och hei feelt leider, wéi insgesamt an dëse Gesetz, de Règlement grand-ducal, deen dësen Étiquetage reglementéiert.

Aus Siicht vun eiser Fraktioun ass besonnesch d'Transparenz bei der Stroumkennzeichnung ganz wichteg. De Client muss kënnen unhand vun enger klorer Kennzeichnung d'Zesummestellung vu senger Energie novollzéien.

Wa mer d'Leit wëlle mat an d'Boot huele vun der Verantwortung, fir dass se hir Verantwortung huele beim Kampf géint de Klimawandel, esou mussen mer och dofir suergen, dass de Konsument och déi néideg Instrumenter zur Verfügung gestallt kritt, fir dat och entsprechend ëmzesetzen.

Nëmmen bei klorer Kennzeichnung iwwert den Undeel vun atomarem Müll respektiv CO₂-Ausstouss bei der entsprecherender Energie kënnen mer de Konsument dorop hiweisen, fir e Paradigmawissel an der Energiepolitik mat hëllefen anzeleeden.

Duerfir wäerte mer och als gréng Fraktioun déi déposéiert Motioun mat ënnerstëtzen.

E weidere Punkt ass d'Incompatibilitéit de la fonction du commissaire. Esou wéi de Rapporteur a senger Ausféierung bemierkt, ass et och fir déi Gréng wichteg, e Poste vun engem Kommissär besonnesch am Beräich vun der Energie innerhalb vum Département de l'énergie ze hunn. Wou mir awer Problemer gesinn hunn, ass de Rôle, deen de Kommissär innerhalb vu sengen Tachen ze erfëllen huet. Esou ass et net normal, dass de Kommissär engersäits de Stat innerhalb der Firma representéiert, wou de Stat Aktionär ass, a gläichzäiteg soll de Rôle vum Kontroller iwwerhuelen.

Hei si mer frou, dass zumindest d'Amendement vun der grénger Fraktioun ugeholl gouf, fir d'Tachen esou ze spezifizéieren, dass déi Incompatibilitéit sech net stellt. Et stellt sech awer méi eng generell Fro iwwert d'Partizipatioun vum Stat innerhalb vun der Energiewirtschaft hei zu Lëtzebuerg.

D'Trennung tëschent der Representatioun an der Kontroll ass oft net ëmmer esou ginn. Dës Representatioun innerhalb vun esou Sociéitéiten ass scho problematesch, wann déiselwecht Persoun gläichzäiteg ee Gesetz iwwert déi betreffend Gesellschaften muss ausschaffen.

Dës Feststellung, zumindest d'Bedenken ass awer net nëmmen der grénger Fraktioun opgefall, mä an engem Kommentar aus enger Lëtzebuerger Zeitung, déi der Sozialistesch Aarbechterpartei relativ nosteet, konnt ee virun e puer Woche liesen - ech zitëieren: „Ein Minister, der nach gut zwei Jahren im Amt in den Strudel einzelner Berater geraten ist, die in ihrem Nebenjob in Verwaltungsräten großer Energiekonzerne sitzen.“

Dëst huet vläicht mëttlerweil dozou gefouert, dass d'Diskussioun vum Minister am Beräich vun der Energie hei zu Lëtzebuerg oft eben an der donkelster Donkellammer gefouert ginn.

Dëst trifft awer net nëmmen fir de Wirtschaftsministère zou, genauesou sinn och aner Ministèrenen heivu beträff. Mä erstaunlech ass et natierlech, wann d'Leit aus dem Innenministère de Rôle als Interessevertreeder vum Stat an Energiegesellschaften iwwerhuelen, gläichzäiteg awer deeselwechte Ministère de Gemenge wëllt d'Kompetenz an deem Beräich ofstreiden. Och d'Gemengen hunn niewent dem Stat e wichteg Rôle hei ze iwwerhuelen. Och hei ënnerstellen ech kengem en Abus, d'Äfrostelle vun dëser Vermeschung muss ech awer opwerfe kënnen. Besonnesch an deem Kontext, wou dach d'Gemenge mat Vehemenz an deem Dossier ëmmer nees aus dëser Aufgab erausgedréckt ginn.

E weidere Punkt, an dat ass mäi leschte Punkt, ass de Rôle vum Régulateur. De Régulateur huet, besonnesch an engem liberaliséierte Marché, e ganz wichteg Rôle ze iwwerhuelen, well hie soll de Garant si fir e sécheren a proppere Fonctionnement vum liberaliséierte Marché.



2. Dépôt d'une proposition de loi

Duerfir erlaabt mer, dass ech eng Gesetzespropos déposéieren, déi dem Régulateur en zousätzleche Comité bäiordnet. Mir haten an der Kommissioun doriwwer geschwat, wou zum Amendement gesot ginn ass, dass deen net richtig an dëst Gesetz géif passen, mä éischter an d'Gesetz vum Régulateur. Duerfir hunn ech mer erlaabt, dëse Passus dann an enger Gesetzespropos zum Régulateur bäizesetzen.

- Proposition de loi N°5747 relative à la modification de la loi modifiée du 30 mai 2005 portant 1) organisation de l'Institut Luxembourgeois de Régulation, 2) modification de la loi modifiée du 22 juin 1963 fixant le régime des traitements des fonctionnaires de l'État.

An dee Régulateur soll mat engem «comité consultatif réunissant des représentants des petits et grands consommateurs d'énergie, des petits et grands producteurs d'énergie, des gestionnaires de réseau, de distribution et de transport, des travailleurs ainsi que des associations de protection de l'environnement luxembourgeoises» als Missioun hunn, de Régulateur bei senger Missioun ze begleeden.

» M. le Président. - Et ass also den Dépôt vun enger Proposition de loi?

» M. Henri Kox (DÉI GRÉNG).- Jo. Merci, Här President.



3. 5605 - Projet de loi
1) relative à l'organisation du marché de l'électricité;
2) instaurant un poste de Commissaire du Gouvernement à l'Énergie;
3) abrogeant

- la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport;

- la loi du 4 janvier 1928 concernant l'établissement et l'exploitation des réseaux de distribution d'énergie électrique dans le Grand-Duché de Luxembourg approuvant la convention de concession du 11 novembre 1927 ainsi que ses annexes;

- la loi du 30 juin 1927 approuvant le contrat de fourniture de courant du 11 avril 1927 pour l'électrification du Grand-Duché de Luxembourg;
- la loi du 2 février 1924 concernant les distributions d'énergie électrique dans le Grand-Duché de Luxembourg;
- la loi modifiée du 24 juillet 2000 relative à l'organisation du marché de l'électricité;

et

4) modifiant

- la loi du 30 mai 2005 portant 1) organisation de l'Institut Luxembourgeois de Régulation; 2) modification de la loi modifiée du 22 juin 1963 fixant le régime des traitements des fonctionnaires de l'État;

- la loi modifiée du 22 juin 1963 fixant le régime des traitements des fonctionnaires de l'État

et

5606 - Projet de loi relative à l'organisation du marché du gaz naturel et abrogeant la loi modifiée du 6 avril 2001 relative à l'organisation du mar-

ché du gaz naturel et portant modification 1) de la loi modifiée du 24 juillet 2000 relative à l'organisation du marché de l'électricité et 2) la loi modifiée du 14 décembre 1967 portant institution d'un poste de Commissaire du Gouvernement, portant création d'un Service de l'énergie de l'État et concernant l'exploitation des centrales hydroélectriques d'Esch-sur-Sûre et de Rosport (suite)

Discussion générale (suite)

Ech kommen zum Schluss. Aus menger Ausféierung zu deem Gesetz geet ervir, dass déi Gréng domat sécherlech dës Gesetz net kënnen matstëmme. Éischters eng ganz Rei vu formalistesche Problemer hate mer, fir dat alles kënnen nozevollzéien. Quant à la forme kënnen mer doduerch dat heiten net ënnerstëtzen. Quant au fond ass et besonnesch de soziale Volet, deen eis ganz déifgräifend Suerge mécht, well deen net ausräichend, souwuel vun de Majoritéitsparteie wéi och vun der Regierung, ausgeduecht ginn ass.

Och am ekologesche Beräich sinn eng ganz Rei vun Elementer, déi méi wäitgräifend hätte missen duerchgegraff ginn. Och am demokratesche Verständnis sinn eng Rei vu Mësstéin innerhalb vun deem Gesetz nozeliesen an erauszehéieren.

Duerfir: Zum Schluss wëlle mer nach eng Kéier drop hiweisen, dass mer dëse Gesetz net zoustëmme an ech soen lech Merci fir d'Nolauschteren.

» Plusieurs voix. - Très bien!

» M. le Président. - Merci, Här Kox. D'Wuert huet elo den Här Mehlen. Här Mehlen, wann ech gelift!

» M. Robert Mehlen (ADR).- Merci, Här President. Dir Dammen an Dir Härën, ech wëll mech ganz kuerz deene Mercien an, ech géif bal soen, Félicitatiounen uschléissen, déi hei ausgesprach gi sinn. Ganz besonnesch un d'Adress vum Président-Rapporteur, deen et effektiv an enger ganz schwiereger Situatioun - an heiansdo an engem Imbrogljo, wou ee bal den Duerchbléck verluer huet -, ëmmer erëm fäerdeg bruecht huet, fir d'Diskussiounen weiderzebréngen a leschten Enns, wann och mat vill Utsch a Wéi, dach derfir ze suergen, datt dat Gesetz elo ganz kuerz virun de parlamentaresche Vakanze ka gestëmmt ginn.

Dat ass ganz sécher kee Paradebeispill vu gudder parlamentarescher Aarbecht an ech schléisse mech och dem Président-Rapporteur sengen Iwwerleeungen un, wat d'Moyenen ubelaangt, déi d'Parlament huet, wann et sech esou engem décke Batz wéi deem heite vis-à-vis gesäit.

Et ass, Här President, e ganz technesch Gesetz. Dat gesäit een eleng am Artikel 1, wou een am Stroumgesetz eleng 53 Definitioune virfënn, am Gasgesetz der 41. Ech hätt mer gär de Plëséier gemaach, se hei der Rei no opzezielen, nëmmen fir no bausen daitlech ze maachen, wéi technesch dat Ganzt ass. Leider feelt mer d'Zäit dofir.

Eleng de koordinéierten Text vum Gesetz, dat si beim Stroum knapps 50 Säiten a beim Gas knapps 40 Säiten. Ech mengen, dat ënnersträicht de Volume an d'Komplexitéit vun deem Gesetz.

Mir haten och - dat hunn anerer scho gesot - 19 Sätzungen. An et muss ee wierklech bedauern, datt dat alles ënnert deem enormen Zäitdruck huet misse stattfannen. Zäitdruck, deen dodra bestanen huet, datt mer alles wollte maachen an och wëlle maachen, fir deene Strofen ze entgoen, déi eis wéi en Damoklesschwert iwwert dem Kapp hanken.

Hei sinn effektiv déi elementar parlamentaresch Spillregelen, un déi mir gewinnt sinn eis ze halen, mëssuecht ginn. Dat hätt, Här President, net misse sinn. Et hätt net dierfe sinn!

D'Erklärungen, déi mir jo vu Säite vun der Regierung kritt hunn, sinn déi, datt déi viregt Regierung effektiv vill ze vill laang geschlof huet oder praktesch näischt gemaach huet. An dann, wa gesot gétt, datt et am Ministère vun deem Moment un u Fachleit gefeelt hätt, fir dat kënnen ëmzesetzen, ech mengen da muss een, egal wéi et ass, an der Regierungsverantwortung déi néideg Moosnamen ergräifen: Sech entweder déi richtig Leit eranhuelen oder et muss een effektiv sech Hëllef vu bausse siche goen, wat, wéi et schéngt, leider net geschitt ass.